

四庫全書

史部

欽定四庫全書

通志卷二

宋 石 迪 功 郎 鄭 樵 漁 仲 撰

五帝紀第二

帝少昊 帝顓頊 帝嚳 帝堯 帝舜

帝少昊青陽氏即元囂也亦謂之摯或言名摯以金德
王天下亦謂之金天氏邑於窮桑帝初為己姓之祖後
改為嬴作都於曲阜樂曰九淵用度量制樂器有鳳鳥

之瑞故以鳥紀官為鳥師而鳥名鳳鳥氏歷正也元鳥氏司分者也伯趙氏司至者也青鳥氏司啓者也丹鳥氏司閉者也祝鳩氏司徒也鵙鳩氏司馬也鴈鳩氏司空也爽鳩氏司寇也鵲鳩氏司事也五鳩鳩民者也五雉為五工正九扈為九農正官修其方而天下理帝有四子重該修熙重為木正曰句芒該為金正曰蓐收修熙相代為水正曰元冥又有金天氏之裔子曰昧為元冥師有共工氏之子為土正曰句龍有高陽氏之孫黎

為高辛氏之火正曰祝融是為五官皆在高陽高辛之

世少昊在位八十四年年百歲

或云在位百年命歷序曰少昊傳八世五百年

或云十世四百年葬雲陽

臣謹按昊亦作皞以能修太昊之法故曰少昊或言明象日月故曰少昊然昊者天之昭著也太昊少昊皆明於天事者諸家記載並存少昊惟司馬遷失紀謂黃帝崩高陽立且有君如少昊詎可不書況與高陽高辛堯舜之帝是為五

帝顓頊高陽氏黃帝之孫昌意之子生十歲而佐少昊
十二而冠二十即帝位受學於綠圖靜淵以有謀疏通
而知事養材以任地載時以象天依鬼神以制義治氣
以教化絜誠以祭祀樂曰五莖

或云六莖

作都于衛是為帝

邱後徙高陽故稱高陽氏尚赤薦玉以赤繒少昊之衰
也九黎亂德民神雜糅不可方物家為巫史無有要質
民匱于祀嘉生不降無物以享禍災荐臻莫盡其氣顓
帝受之乃命南正重司天以屬神北正黎司地以屬民

使復舊常無相侵瀆作歷以孟春為元是時正月朔旦
立春五星會于營室冰始泮蟄始出雞三號天曰作時
地曰作昌人曰作樂鳥獸萬物皆以和應故顓帝聖人
為歷宗也命飛龍氏作樂效八風之音名曰承雲以祭
上帝北至于幽陵南至于交趾西至于流沙東至于蟠
木東海有山名曰度索工
有大桃樹屈蟠三千里動靜之物小大之神日月所
照莫不砥屬有子四人曰窮蟬伯鯨皋陶老童顓帝崩
葬濮陽在位七十八年年九十八歲

或云九十一歲命
歷序曰顓帝傳九

世三百五十年或云
八世五百四十八年

臣謹按高陽氏以水德王天下又按容成造歷雖起
於黃帝而三統歷始自伏羲然歷法以顓帝為宗上
古之時民淳俗熙為君者惟以奉天事神為務故其
治略於人而詳於天其行事見於方冊者載在歷家
及緯書為多唐虞之後以民事為急故其治詳於人
而略於天孔子不語怪力亂神故著書斷自唐虞又
按顓帝之法婦人不避男子於路者荆之四達之衢

命鰥先為樂倡鰥乃偃浸以其尾鼓其腹其音英此
皆誕言也

帝嚳高辛氏亦曰侖黃帝之曾孫也黃帝生元囂是為
少昊元囂生蟠極蟠極不得位而生嚳姬姓嚳問道於
栢招年十五佐高陽三十登帝位以其居於高辛故曰

高辛氏樂曰六英

或曰五英

作都于亳尚黑薦玉以黑繒命

咸黑為聲歌九韶六列六英命倕作鞀鼓鍾磬吹苓管
塤箎鳳鳥天翟來舞以光帝德命重黎為火正曰祝融

或言顓帝生稱稱生卷章卷章生重黎為讐火正燿
敷大天明地德光照四海生柔嘉材故命曰祝融共工
氏作亂帝命重黎誅之而不盡帝以庚寅日誅重黎以
其弟吳回為重黎後復居火正為祝融遂平共工氏帝
生而神靈自言其名博愛利物不於其身聰以知遠明
以察微順天之義知民之急仁而威惠而信修身而天
下治取地之財而節用之撫萬民而利誨之歷日月而
迎送之明鬼神而謹事之帝執中而徧天下日月所照

風雨所至莫不服從帝有六子陳鋒氏女曰慶都孕十
四月生堯於丹陵姬訾氏女曰常儀生摯有郤氏女曰
姜原生棄有娥氏女曰簡狄生契又有閼伯封商丘主

辰實沈封大夏主參未知其母之為誰也摯在位七十

五年年百五歲

或云六十三年年百歲又云九十八歲九十二歲

葬濮陽

命歷序曰

摯傳十世四百年

摯嗣立荒淫無度諸侯廢之推堯為天子摯

在位九年非帝之限不當五運自黃帝至摯三百四十

一年少昊至摯四世二百四十一年

命歷序曰黃帝傳十世千五百二十

年或云
十八代

臣謹按高辛氏以木德王天下又按共工氏在伏羲
之後專任知刑以水德居木火之間霸而不王亦以
水紀官周語曰共工欲壅防百川墮高堙庫以害天
下皇天弗福庶民弗佑是以滅亡賈逵曰共工諸侯
也炎帝之後姜姓高陽氏衰共工與高辛爭而王歸
藏啓筮曰共工人面蛇身朱髮淮南子曰共工之力
觸不周之山使地傾東南與高辛爭而帝遂潛于淵

又曰舜時有共工振滔洪水以薄空桑文子曰共工
水害顯帝誅之荀卿曰禹伐共工據此所言皆不足
信然共工氏當始於伏羲之後子孫承傳以至堯舜
之世皆謂之共工氏

帝堯陶唐氏曰放勳嚳之子姓伊祁身長十尺年十五
佐兄摯封唐侯二十一即帝位或言摯禪于堯高氏云

摯崩而帝放勳立堯始封于唐

今中山唐邑

後遷于晉陽及

為天子都平陽樂曰大章帝聰明文思允恭克讓其仁

如天其知如神就之如日望之如雲富而不驕貴而不
舒以尹壽為師以許由為友內則親睦九族外則辨章
百姓協和萬邦黎民於變時雍黃收純衣彤車乘白馬
尚白薦玉以白繒茅茨不翦土階三尺樸桷不斲素題
不枿大羹不和粢食不鑿大路無文越席不純飯土簋
飲土飴夏葛衣冬鹿裘棄金玉捐文綺不視異物不寶
玩器衣履不盡敝不更為禁淫偽輕徭賦不奪民時不
爭民利置諫鼓達窮民立謗木使人書之樂聞過也巡

狩告成周流五嶽存鰥寡賑荒札一民饑則曰我饑之
一民寒則曰我寒之一民罹辜則曰我陷之故民戴之
如日月愛之如父母不賞而勸不罰而治三苗復九黎
之亂堯克之于丹水之浦以服南蠻不忘重黎之舊使
其後復興之是為義氏和氏乃命以順天之道歷象日
月星辰分為四序以授民時義仲居嵎夷理東作以殷
春中義叔居南交理南訛以正夏至和仲居昧谷理西
成以殷秋中和叔居朔方理朔易以正冬至四時之氣

既正日星之躔無爽故人民之作息鳥獸之孳乳皆可得而理乃正閏餘以成歲功下逮商周重黎氏世叙天地而別其分主是時龍門未開呂梁未發河出孟門江淮通流無有平原高阜故曰洪水滔天懷山襄陵堯憂民之憂而求治水者羣臣四嶽皆舉高陽氏之子伯鯨堯封鯨為崇伯使之治水鯨乃興徒役而作九仞之城訖無成功堯有子十人散宜氏之女曰女皇生丹朱應嗣堯以年老欲異位而丹朱嚚訟不可授乃以天下授

許由許由不受乃訪諸四嶽嶽曰有鰥民曰虞舜瞽瞍之子父頑母嚚弟傲舜以孝道諧其家使不至於惡堯曰我其試哉乃妻以二女封之有虞而為諸侯歷試三年知舜之德以為授舜則天下得其利而丹朱病授丹朱則天下病而丹朱得其利堯曰終不以天下之病而利一人卒授舜陶唐氏之世俗熙民泰有老人擊壤而歌於路曰吾日出而作日入而息鑿井而飲耕田而食帝力於我何有哉故仲尼稱之曰惟天為大惟堯則之

蕩蕩乎民無能名焉巍巍乎其有成功堯生以甲申即位以甲辰召舜以甲午召舜之年堯七十一矣舜以甲寅攝政堯九十一矣以辛巳崩是避位二十八年在位九十八年凡百十八歲葬于穀林實濟陰百姓悲哀如喪父母三年四方莫舉樂舜畢三年之喪避丹朱於南河之南諸侯朝覲者不之丹朱而之舜獄訟者不之丹朱而之舜謳歌者不謳歌丹朱而謳歌舜舜曰天也而後之中國踐天子位焉

臣謹按陶唐氏以火德王天下又按陶唐之世越裳國獻神龜蓋千歲方三尺餘背有科斗文記開闢以來堯命錄之謂之龜歷又堯之庭有草生焉曰蓂莢十五之前日生一葉十五之後日落一葉小餘則一葉厭而不落觀之可以知旬朔故又名歷草景星見甘露降醴泉溢朱草生神禾敷鳳巢阿閭龍見宮沼玉藕生沼中菟化為禾鳥化為白宮中一日而十瑞又按淮南子堯時十日並出堯命羿仰射之中其九

九鳥皆死墮其羽翼或言十日並出焦禾稼殺草木而民無所食獫狁鑿齒九嬰大風封豨修蛇皆為民害堯使羿誅鑿齒於疇華之野殺九嬰於凶水之上繳大風於青邱之澤上射十日下殺獫狁斷修蛇於洞庭禽封豨於桑林於是山川險夷道里遠近可得而理也又按任昉述異記堯誅鯀於羽山化為黃熊入於羽淵今會稽人祭禹廟不用熊白黃能即黃熊也陸居曰熊水居曰能昉按今江淮中獸名能能蛇

之精冬化為雉春復為蛇今吳中不食雉毒故也

臣謹按能乃來切所以古人借為耐字其音與熊自是相遠惟文相近所以致訛實非熊也又按如淳曰誹謗之木即橋梁交午柱頭也應邵曰誹謗木橋梁邊版也所以書政治之愆至秦去之

帝舜有虞氏曰重華亦曰大舜亦曰都君顓頊生窮蟬窮蟬生敬康敬康生句芒句芒生螭牛螭牛生瞽瞍瞽瞍生舜自窮蟬至舜皆微為庶人舜重瞳龍顏大口黑

色長六尺生於姚墟故姓以姚舜之母曰握登死而瞽
瞽以繼室生象瞽瞍惑於繼室而昵象象復陰相父母
有殺舜之心舜無所恨而事父母與弟不敢怠遑年雖
五十猶作嬰兒慕親堯聞其賢聘之於草茅之中與之
語禮樂而知其道廣大不窮妻以二女以觀其內使九
男與處以觀其外舜遷于媯汭二女從之率舜之教不
敢以貴易其親戚盡婦道焉九男相與益篤舜冀州人
也耕于歷山歷山之人皆讓畔漁于雷澤雷澤之人皆

讓居陶於河濱河濱之器不苦窳作什器於壽邱就時
於負夏一年所居成聚二年成邑三年成都昔高陽氏
有才子八人天下謂之八愷高辛氏有才子八人天下
謂之八元比十六族者世濟其美不隕其名堯不能舉
舜舉八愷使主后土以揆百事莫不時序舉八元使布
五教于四方內平外成昔帝鴻氏有不才子天下謂之
渾敦少昊氏有不才子天下謂之窮奇顓頊氏有不才
子天下謂之檮杌縉雲氏有不才子天下謂之饕餮渾

敦窮竒禱祀饗饗皆惡獸也能為人害故天下之人目
為四凶堯不能去舜乃流四凶族投諸四裔以禦魑魅
舜有大功二十四方莫不仰戴堯知舜之足授天下也
使攝行天子事舜辭不獲乃以正月朔受終于文祖文
祖者堯之祖廟以明天下之重不敢以已授也舜用璿
璣玉衡以齊日月五星之政類于上帝禋于六宗望于
山川徧于羣神集五瑞五瑞者五等諸侯所執之玉也
覲四嶽羣牧然後班瑞修巡狩之禮歲二月東巡狩至

于岱宗柴望秩于山川覲東方諸侯協時月正日同律
度量衡修五禮五玉三帛二生一死贄如五瑞卒乃復
五月南巡狩八月西巡狩十一月北巡狩各於方嶽其
禮如初歸格于祖廟用特牛禮五載一巡狩諸侯四朝
敷奏以言明試以功車服以庸肇十有二州封其山望
濬其川瀆法有常典惟刑之恤伯鯨治水九載而功用
不成三苗為亂於江淮驩兜舉共工試以工師淫荒怠
事舜因巡狩歸而言於帝請流共工于幽州以變北狄

放驩兜于崇山以變南蠻遷三苗於三危以變西戎殛
鯀于羽山以變東夷四罪而天下咸服舜攝位二十八
年堯崩舜仰慕三年坐則見堯於牆食則覩堯於羹三
年喪畢而避丹朱天下不歸丹朱而歸舜然後踐天子
位即位之明年正月元日格于文祖詢四嶽闢四門明
四目達四聰四方之情無所壅蔽命十二牧所重民食
敬授民時遠至邇懷蠻夷率服舜本處虞之媯汭號曰
有虞氏作都于蒲阪尚赤其社用土封丹朱于丹淵為

諸侯以奉先祀服其服禮樂如之謂之虞賓示弗臣也
舜載天子之旗往朝瞽瞍彌奉子道封象於有庠象雖
為諸侯不得為政天子使吏治其民而納其貢賦舜廣
視聽求賢以自輔作五明扇立誹謗木恭己無為彈五
絃之琴歌南風之詩曰南風之薰兮可以解吾民之愠
兮南風之時兮可以阜民之財兮當堯之時禹皋陶稷
契伯夷夔龍垂益彭祖皆以舉用未有分職舜知任不
專則功不成業不世則知不周鯀雖治水無功而禹為

其子九年之間足知利害不使易業故首命禹為司空
平水土誅父用子而舜無疑心戮力勤王而禹無仇色
又命棄為后稷播百穀命契為司徒敷五教命皋陶為
士明五刑命垂作工理百工命益作虞治山澤命伯夷
作秩宗典三禮命夔典樂教胄子命龍作納言出納帝
命舜於是總命之曰各恭厥職時亮天功三載考績三
考黜陟幽明庶績咸熙乃封契於商賜姓子封棄於邵
賜姓姬封禹於夏賜姓姁禹曰非予能成大費是輔舜

嘉大費之功錫以元玉妻以姚姓之女封之土田賜姓
嬴祚四嶽之國命以侯伯賜姓姜封於申呂即伯夷也
垂益夔龍之後不知所封夔效山林谿谷之音以歌以
麋輅置缶而鼓之擊石拊石象上帝石磬之音以致舞
獸拌五絃之瑟為十五絃命曰大章以祭上帝或曰重
黎舉夔舜以為樂正乃命益八絃為二十三絃之瑟夔
修九韶六列六英以明帝德正六律和五聲以通八風
重黎欲益求人舜曰一夔足矣十二牧行而九州莫敢

違惟禹之功為大披九山通九澤決九河復舊制而定九州土田貢賦各効其職方五千里至於荒服天下明德自虞帝始其樂曰大韶故仲尼稱之曰韶盡美矣又盡善也君臣悅懌相和而歌曰元首明哉股肱良哉庶事康哉又相戒勅而歌曰元首叢脞哉股肱惰哉萬事墮哉于時日月光華卿雲叢聚又相和而歌卿雲帝歌曰卿雲爛兮糺繆繆兮日月光華旦復旦兮八伯稽首曰明明上天爛然星陳日月光華宏于一人帝乃再歌

曰日月有常星辰有行四時順經萬姓允誠於予論樂
配天之靈遷于賢聖莫不咸聽襲乎鼓之軒乎舞之精
華已竭褰裳去之有苗氏左洞庭右彭蠡大山在其南
殿山在其北負固不服禹欲伐之舜曰吾德不厚而行
武可乎乃大敷文德舞干羽于兩階七旬有苗格初舜
娶堯二女曰娥皇女英女英生商均亦不肖舜子九人
在位三十三載命禹攝行天子事禹推與臯陶不獲乃
以正月朔旦受命于神宗帥百官若帝之初舜生三十

徵庸三十在位五十載陟方乃死是為天子五十年年
百十歲司馬遷曰舜二十以孝聞三十堯舉之五十攝
行天子事五十八堯崩六十一代堯踐帝位三十九年

南巡狩崩於蒼梧之野葬於江南九疑是為零陵

或言舜葬

于紀市廛不變其肆皇甫謐曰舜以堯之二十一年甲子生三十一年甲午召用七十九年壬午即真百歲癸卯崩蓋本史記之言也或云舜豫薦禹於天十七年而舜一百五歲或云百十二歲

崩三年之喪畢禹亦避舜之子諸侯歸之然後踐天子
位丹朱商均皆有土世為唐虞之國以奉先祀服其服

禮樂亦如之以客禮見天子天子弗臣示不敢專也有

虞氏禘黃帝而祖顓頊郊堯而宗舜幕能帥顓頊者也

故報焉

熊安生解禮云周以黃帝堯舜之後為三恪

臣謹按有虞氏以土德王天下又按司馬遷本孟子

之言而表裏之曰堯賜舜絺衣與琴為築倉廩與牛

羊瞽瞍尚復欲殺之使舜上塗廩瞽瞍從下縱火焚

廩舜乃以兩笠自扞而下去得不死後瞽瞍又使舜

穿井舜穿井為匿空旁出舜既入深瞽瞍與象共下

土石實井舜從匿空出去瞽瞍象喜以舜為已死象
曰本謀者象象與其父母分乃取舜妻二女與琴而
以牛羊倉廩與父母象乃止舜宮居鼓其琴舜往見
之象鄂不懌曰我思舜正鬱陶舜曰然爾其庶哉舜
復事瞽瞍愛弟彌謹又按韋昭曰三苗炎帝之後諸
侯也堯舜之時誅討有罪廢絕其世不滅其國立其
近親紹其先祀所以有苗國歷代常存屢不從化隨
巢子汲冢紀年曰三苗將亡天雨血夏有冰地坼及

泉青龍生於廟日夜出晝日不出又按韓子曰瞽瞍
為父而舜放之象為弟而舜殺之觀此所言則六經
不得夫子所謂聖人者其難為聖人矣韋昭三苗之
說有理哉又按任昉述異記湘水去岸三十里有相
思宮望帝臺昔舜南巡而歿葬於蒼梧娥皇女英追
之不及相與慟哭淚霑竹竹文悉為之斑斑然又云
會稽山下有虞舜巡狩臺臺下有望陵祠舜南巡九
疑民思之故作是祠又云舜都郭門古宮存焉宮前

有堯臺舜館銘記文古不復識者按皇覽曰舜冢在
零陵營浦縣其山九谿皆相似故號九疑傳曰舜葬
蒼梧象為之耕山海經曰蒼梧山舜葬于陽丹朱葬
于陰皇甫謐曰二妃葬衡山

右五帝自少昊至舜凡五世共三百八十五年

通志卷二

欽定四庫全書

通志卷三上

宋右廸功郎鄭樵漁仲撰

三王紀第三上

夏

禹夏后氏曰文命亦曰大禹

元年戊戌

姒姓顓帝生鯀鯀生

禹禹之母有莘氏女曰修己禹生於石紐長於西羌長九尺二寸聲為律身為度敏給克勤其德不違其仁可

親其言可信疊疊穆穆為綱為紀見耕者五耦而式過
十室之邑則下為秉德之士存焉聞善言則拜不貴尺
璧而重寸陰當堯之時洪水滔天用鯀治之九年不成
舜攝堯之政巡狩而行見治水無狀乃殛鯀於羽山天
下皆以舜之誅為是舜乃舉禹使續父業天下皆以舜
之舉為公堯崩舜欲廣堯之績而求總百揆之人僉曰
伯禹作司空舜曰嗟禹汝平水土惟時懋哉禹念前日
之非度傷先人之無成一朝受命不敢迨遑勞身焦思

面目黧黑步不相過居外十三年過家聞其子呱呱而泣門不入也菲飲食致孝乎鬼神惡衣服致美乎黼冕卑宮室盡力乎溝洫陸行乘車水行乘舟泥行乘橈山行乘樁身執耒耜以為民先股無胈脛無毛手足胼胝體幹枯蝕高高下下䟽壅導滯左準繩右規矩載四時封九山決九川障九澤豐殖九藪汨越九原宅居九隩合通四海品處庶類禹常言人無食則不能使也不利於人則不能勸也民勞而無怨苦者利之也民有鬻子

者禹以歷山之金鑄幣而與之償命益予衆庶稻可種
卑濕命稷予衆庶難得之食食少調有餘相給以均諸
侯初舜分十二州禹乃復舊制為九州行水自冀州始
堯都冀州以天子之京邑故不言所底之山川餘八州
皆以山川疆其所底為萬世不易之法以州國有變遷
而山川無變遷故也次兗州底濟河次青州底海岱次
徐州底海岱及淮次揚州底淮海次荊州底荆衡次豫
州底荊河次梁州底華陽黑水次雍州底黑水西河州

皆先治其山川然後定其土田賦入然後正其貢篚然後道一州之水使有所歸故民得安居粒食為萬世之利使冀兗徐荆豫梁雍七州之水各歸于河使青州之水歸于濟使揚州之水歸于淮泗九州既理然後總理天下凡山川皆起於極西而盡於極東水徇山而行故禹之導山川皆自西始導九山各有所至岍岐嶓冢至於荆山壺口雷首至於太岳底柱析城至於王屋太行恒山至於碣石西傾朱圉鳥鼠至於太華熊耳外方桐

栢至於陪尾內方至於大別岷山之陽至於衡山九江
之南至於敷淺原導九川各有所歸弱水歸于合黎黑
水歸於南海河自積石東歸于海九河從之漢自蟠冢
南歸于江三澨從之江自岷而東由中歸于海澧水彭
澤從之濟自滎而北由東歸于海荷汶從之淮自桐栢
東歸于海沂泗從之渭自烏鼠同穴東歸于河涇漆沮
從之洛自熊耳東北歸于河瀍澗伊水從之自是九州
攸同四隩既宅九山刊旅九川滌源九澤既陂四海會

同六府孔修庶土交正底慎財賦各循三品成賦中邦
錫之封土賜以姓氏各戴君德無或違命然後弼成五
服至于五千里五百里甸服郊畿之服也効其賦入甸
而侯侯而綏綏而要而要而荒各五百里遵其法守東漸
于海西被于流沙朔南暨聲教訖于四海天乃錫禹元
圭為瑞以告成功洪水漏中州乾百川順流蛇龍潛處
民得去高險處平土者禹也故曰微禹之功吾其魚乎
天無伏陰地無散陽水無沉氣火無災燁神無間行民

無淫心時無逆數物無害生天下皆宗禹為山川鬼神
主舜即位三十有三載耄期倦于勤命禹總其衆攝行
天子事禹固辭不獲乃受命十七年舜南巡狩而崩三
年喪畢禹避舜之子於陽城天下諸侯皆去商均而朝
禹於是即天子位號夏后氏元年作都于韓或言安邑
即韓地
尚黑社用松牲用黑以黑為徽號收冠元衣十寸為尺
封丹朱於唐商均於虞為諸侯作樂曰大夏改正朔以
建寅為正月命皋陶為夏籥九成昭其功也以五音聽

治揭鐘鼓磬鐸鞀以待四方之士為銘於龔簾曰導以
道者撓鼓喻以義者鼓鐘告以事者振鐸語以憂者擊
磬有獄訟者搖鞀嘗曰吾不恐四海之士留於道路恐
其留吾門也一饋十起一沐三捉髮以勞于下出見罪
人下車問而泣之左右曰罪人不道何痛之為禹曰堯
舜之人皆以堯舜之心為心今朕為君朕之人各以其
心為心是以痛之既服九州乃收天下之銅鑄九鼎以
象九州之物初黃帝作車少昊加牛奚仲加馬禹命奚

仲為車正建旗旄以辨等級古有醴酪禹始命儀狄作酒禹飲而美乃疏儀狄遂絕旨酒曰後世必有以酒亡國者禹舉皋陶而薦之且授政焉皋陶卒封其後於英六或在許舉其子伯益任以政禹在位十年南巡狩會諸侯於塗山執玉帛者萬國

其山今在鍾離

禹濟江黃龍負舟舟人恐禹仰天而歎曰吾受命於天生寄也死歸也予何憂於龍哉視龍猶蜺蜺龍俛首而逝禹致羣臣於會稽防風氏後至戮之防風者汪芒氏之君也漆姓守封

岨之山禹崩以天下授益葬于會稽之山陰在位十年

年百歲

或云在位十五年

三年喪畢益避禹之子啓居於箕山

之陰啓賢天下屬意焉益佐禹日淺天下未洽故諸侯皆去益而朝啓曰吾君帝禹之子也夏后氏禘黃帝而祖顓頊郊鯀而宗禹

臣謹按夏后氏以金德王天下又按禹平水土萬邦作乂乃使大章步自東極至於西垂二億三萬三千五百里七十一步又使豎亥步自南極盡於北垂二

億三萬三千五百里七十五步四海之內東西二萬八千里南北二萬六千里又按禹時天雨金三日亦嘗雨稻又按述異記今吳越間防風廟刻木作形龍首牛耳連眉一目禹會塗山防風後至誅之其長丈骨專車今南中民有姓防風者即其後也皆長大俗云祭防風奏防風古樂截竹長三尺吹之如狗嗥三人被髮而舞今湖州武康防風故國也又按越傳曰禹至大越上苗山大會計爵有德封有功遂更苗

山曰會稽言會計也因病死葬葦棺穿壙深七尺上無瀉泄下無郤水壇高三尺土階三等周方一畝墨子曰禹葬會稽衣裘三領桐棺三寸地里志云上有禹井禹祠相傳以下有羣鳥耘田

臣又按劉恕曰大江之南古之要服舜禹南巡崩不返葬禹非不尊其君啓非不孝其父時享在乎廟貌魂氣無所不之秦漢以下崇尚墓祭違經棄禮遠事尸柩難以語乎理矣

帝啓

元年丁未皇甫謐曰甲辰

其母塗山氏之女也有扈氏不服啓

伐之召六卿誓師大戰于甘之野遂滅有扈氏筮享神

於太陵之上是為鈞臺之享又筮于晉之墟作璿臺於

晉水之陽在位九年崩

皇甫謐曰十年

子太康立

臣謹按夏為扈商為崇秦改鄠縣縣北二十里有故

扈城城周四里亦有甘亭又按世本有扈氏夏同姓

或云啓庶兄以堯舜傳賢禹獨與子故伐啓淮南子

曰有扈氏為義而亡又按淮南子啓之母塗山氏禹

治洪水通轅轅山化為熊謂塗山氏曰欲餉聞鼓聲
乃來禹跳石誤中鼓塗山氏往見禹方作熊慙而去
至嵩高山下化為石禹曰歸我子石破北方而啓生

帝太康

元年
丙辰

太康尸位以逸豫滅厥德黎民咸貳乃盤

遊無度畋于有洛之表十旬弗反有窮后羿距之于河
厥弟五人御其母嫫于洛之汭述大禹之戒而作五子
之歌羿之祖世為射官天子賜之弓矢使司射夏之衰
也自鉏遷于窮石號有窮氏太康不得入國羿遂廢之

立其弟仲康太康在位二十九年失國而崩

臣謹按許慎曰羿帝嚳射官也又按淮南子堯時十日羿射九鳥又曰羿除天下之害死為宗布楚辭天問曰羿焉殫日烏焉解羽博物志曰羿與鑿齒戰于疇華之野羿持弓鑿齒持矛羿殺之或曰河伯溺殺人羿射其左目風伯壞人屋室羿射中其膝舊云帝嚳堯時各有羿羿乃善射之號也臣按其字從羽從升升即拱字拱羽為羿與伊尹之伊相類伊從人從

尹以其人能尹正天下伊與羿皆是指其人之名而制字也竊觀今之庸俗以般輸善掄才凡古屋壯麗者皆曰魯般造殊不知般為何代之人羿必太康時人以射得名堯嚳之時亦有善射之人世之訛者以為羿也

仲康

元年乙酉

仲康初即位羲和失職沉湎于酒昏迷天象

日月無紀仲康命胤侯為大司馬總六師以征之仲康之世微弱政出於羿在位十三年崩子相立

帝相

亦曰相安元年戊戌

相徙都商邱征畎夷黃夷其後于夷來

賓東夷有九種曰畎夷于夷方夷黃夷白夷赤夷元夷

風夷陽夷相與有扈戰于甘澤不勝六卿請復之相曰

不可德之不厚教之不修也於是處不重席食不貳味

琴瑟不張鐘鼓不陳子女不飾親親長長尊賢使能期

年而有扈氏服然相之世政出於羿終為羿所殺或言

為羿所逐失國居商邱依夏同姓諸侯斟灌斟鄩在位

二十八年

有窮氏亦曰后羿自鉏遷于窮石因夏民以代夏政

元年丙寅

國號有窮樂正后夔之子伯封貪惓無厭忿類

無期謂之封豕羿滅之夔是以不祀羿善射好田獵
不修民事而淫于原獸棄其賢臣武羅伯因熊髡尨
圉而用寒浞寒浞者伯明氏之讒子弟也羿以為相
浞行媚于內施賂于外愚弄其民而虞羿于田樹之
詐慝羿猶不悛將歸自田家衆殺而亨之以食其子
其子不忍食死于窮門羿篡夏自立凡八年

或云寒二年

浞復殺羿而篡之

元年戊戌寒國今濰州東二十三里寒亭是也

浞因羿室

不改有窮之號生澆及豷澆既長矣浞使之用師滅

斟灌及斟鄩而殺夏后相乃封澆于過封豷于戈浞

在位三十二年

或云十年

為夏之遺臣靡所滅而立少康

帝少康

元年丙午

少康夏后相之子也母曰后緡當寒浞用

澆滅相之時后緡方娠逃出自竇歸于有仍生少康既

長為仍牧正澆使其臣椒求之逃奔有虞為虞庖正虞

君妻之以二姚而邑諸綸有田一成有衆一旅布德行

惠夏衆歸心寒浞恃其讒慝詐僞而不德于民夏之遺

臣靡自有鬲氏收二國之燼滅寒浞而立少康少康使

女艾滅澆于過使季杼

大呂反

滅豷于戈有窮遂亡少康

還舊都復禹之績祀夏配天不失舊物諸侯効職方夷

來賓在位二十一年崩

或云四十九年是促羿寒浞之年歸此

子杼立

臣謹按羿篡夏后相而立八年寒浞殺之因其室而

生澆至澆能用師滅相相死乃生少康及少康生杼

至杼能用師滅豷計太康失邦至少康復夏蓋百年

之間夏之亂甚矣少康之功高矣司馬遷之紀不志其事可謂疏矣

帝杼

亦曰季杼一作子杼省文也元年丁卯

杼在位十七年崩子槐立杼能

帥禹者也戡定寒氏之亂佐父中興故夏后氏報焉

帝槐

帝王世紀作芬或作祖武亦作魁元年甲申

槐之世九夷來御在位二

十六年崩子芒立

帝芒

元年庚戌

在位十八年

或云十三年

崩子泄立

帝泄

或作世或作宗元年戊辰

泄之世畎夷之屬六夷來王始加爵

命在位十六年崩子不降立

帝不降

或作江成元年甲申

不降在位五十九年崩弟廩立

帝廩

或作喬元年癸未

廩在位二十一年崩子廩立

帝廩

或作廣或作廩元年甲辰

廩在位二十年崩不降子孔甲立

帝孔甲

元年甲子

孔甲好事鬼神復為淫亂夏后氏德衰諸

侯畔之在位三十一年崩子皐立

臣謹按孔甲之世天降乘龍河漢各二龍有雌雄孔

甲不能食之而未獲豢龍氏陶唐氏既衰其後有劉

累學擾龍于豢龍氏事孔甲能飲食之賜氏曰御龍
以更豕韋之後龍一雌死潛醢以食夏后夏后饗之

美既而復求之累懼遷于魯縣

今汝州魯山也

帝皐

元年乙未

皐在位十一年崩子發立

帝發

元年丙午

發之世諸夷賓于王門獻其樂舞在位十三

年

或云十一年或云十年

崩子履癸立是為桀

帝桀

元年己未

夏自孔甲以來諸侯多畔桀復不道武傷其

民民不堪命桀有力能申鈎索鐵伐有施有施人女以

末嬉

一作妹喜

末嬉嬖言無不從桀為之作象廊玉牀傾宮

瑤臺瓊室肉山脯林酒池可以運舩糟隄可以望十里
一鼓而牛飲者三千人以樂之諫者以為妖言殺之伊
尹因說湯以伐夏救民湯以為賢而薦於桀桀不能用
而飲之酒羣臣醉者持不醉者不醉者持醉者相和而
歌曰江水沛兮舟楫敗兮我王廢兮盍歸乎盍歸乎
亦大矣伊尹退而更曰樂兮樂兮四牡驕兮六轡沃兮
覺兮較兮大命格兮去不善而從善吾何不樂兮伊尹

既醜有夏復歸于亳告湯曰桀惑末嬉上下離心皆曰
上天弗恤夏命其卒桀有暴臣于辛凌轢諸侯諛臣左
師曹觸龍讒賊忠良關龍逢引黃圖以諫曰古之人君
愛民節用享國之日長今君用財若無窮殺人若恐弗
勝亡無日矣立而不去桀曰子又妖言矣吾之有民猶
天有日日有亡乎日亡吾乃亡於是焚黃圖殺龍逢衆
莫敢視桀愈自賢湯使人哭之桀召湯而囚於夏臺已
而釋之桀欲肆其侈心為有仍之會有緡叛冬十月鑿

山穿陵以通河諫者曰洩天氣發地藏天子失道後必有敗桀殺之暮年瞿山崩為大澤水深九尺山覆於谷下反在上桀見籙書云亡夏者桀於是大誅豪桀大費之裔曰費昌見二日出東焰西沉問於馮夷夷曰西夏東商費昌乃歸湯湯欲伐桀伊尹請之貢職以觀其動桀怒而起九夷之師伊尹曰未可彼尚能起九夷之師湯復修貢職如初太史終古出其圖法執而泣之桀不聽終古奔湯湯告諸侯曰夏為無道暴戾其民窮其父

兄棄其忠良守法之臣自歸于商湯又乏貢職桀起九
夷之師不至伊尹曰可矣明年相湯伐桀桀奔南巢因
放之於南巢在位五十一年湯封夏後至周為杞國舊
云禹之後分封以國為氏有夏后氏有扈氏有男氏斟
尋氏彤城氏褒氏費氏杞氏緡氏辛氏冥氏斟氏戈氏
臣謹按桀之時至德滅而不揚帝道揜而不興發號
逆四時春秋縮其和天地除其德樹社槁而墉裂容
臺振而掩覆犬羣嗥而入淵豕銜蓐而席隩美人擘

首墨面而不容曼聲吞炭內閉而不歌喪不盡其哀
臘不聽其樂西老折勝黃神嘯吟飛鳥鍛翼走獸廢
脚山無峻榦澤無洼水田無立禾路無莎蘋金積折
廉壁襲無理百川沸伊洛竭泰山走山石泣宮中女
子化為龍俄復為婦人甚麗而食人桀命為蛟妾告
吉凶鸛鳴於國十日夕不止天雨血雨木冰六月霜
降桀為夜宮於深谷之中男女雜處三旬不出聽政
一夕大風揚沙填宮合之然桀時雖多災異亦安得

有如此所謂兩日鬪五星錯行鬼哭於國枉矢流地
出黃霧堯山崩灰山亡地震雷霆殺人之異容有之
右夏之世起禹元年戊戌終桀五十一年己酉
十七君十五世通后羿寒浞四百三十二年

商

契

古作
高

帝嚳之子母曰簡狄有娥氏之女也簡狄因浴

而行有三人焉見元鳥墮卵簡狄取而吞之乃孕生契
契佐禹治水有功舜命之曰百姓不親五品不遜汝作

司徒敬敷五教五教在寬封於商

洛今工也

賜姓子

禮緯曰以元鳥

生子故也

契與益稷臯陶見用於堯舜禹之時功業顯著卒

子昭明立卒子相土立相土居商邱宋地也故傳曰閼伯居商邱相土因之卒子昌若立卒子曹圉立卒子冥立冥為夏司空主水勤其官事死於水中商人郊之子振立卒子微立卒子報丁立卒子報乙立卒子報丙立卒子主壬立卒子主癸立卒子天乙立是為成湯

臣謹按商人及周人繼繼者傳父子及者傳兄弟報

丁報乙報丙與主壬主癸皆弟兄之名疑前史指為父子過矣

湯亦曰成湯亦曰履亦曰天乙以其用武得天下故號曰武王為商家創業之祖故廟曰烈祖契之封商本上洛後世遷于亳故京兆杜縣亳亭是也司馬遷云禹興西羌湯起亳俱在西也及湯有天下始居于商邱復命以亳梁之穀熟是也本帝嚳之都故曰湯始居亳從先王居自契至成湯凡八遷亳都有澱水在焉故亦謂之

殷後世遷于囂遷于相遷于耿遷于朝歌而殷商之名
未始偏廢以開國受命之祖所以命也湯為夏方伯得
專征諸侯與葛為鄰葛伯放而不祀湯使問之答以犧
牲粢盛不給湯使遺之牛羊復使亳衆往為之耕其不
祀自若有餉者葛伯殺之而奪其食湯始征之故曰湯
征自葛始東征西夷怨南征北狄怨皆曰奚獨後予后
來其蘇民之戴商久矣夷狄且懷之況中國乎伊尹處
士也名摯耕於有莘之野湯使人以幣聘之五反然後

往見湯言素王及九主之事或言伊尹為有莘氏之媵
臣負鼎俎以滋味說湯致於王道湯舉伊尹任以國政
伊尹乃進君國子民之人皆在王官湯以伊尹為賢而
薦於桀伊尹去湯適夏既醜有夏復歸于亳入自北門
遇汝鳩汝方作汝鳩汝方之篇以言其志也湯出見網
於野者張其四面而祝之曰自天下四方皆入吾網湯
曰嘻盡之矣去其三面而更其祝曰欲左左欲右右欲
高高欲下下不用命者乃入吾網漢南諸侯聞之曰湯

德至矣及禽獸一時歸商者三十六國或言四十國有

白狼銜鈎及黃金黑玉之瑞夏末昆吾氏伯而為亂湯

為景亳之會以徵兵於諸侯湯親秉鉞伐韋顧及昆吾

韋顧昆吾之與國也復黨於桀

昔高辛火正祝融氏曰黎其後有八姓昆吾蘇

顧溫已姓也融夷豢龍董姓也彭祖豕韋諸稽彭姓也舟人禿姓也鄩鄩路偃陽姁姓也鄩呂曹姓也又有芊

姓斟姓惟斟無後或云帝嚳之祝融曰吳回生陸終陸終有子六人圻剖而生長昆吾次參胡次彭祖次會人

次安斟湯既克三國伊尹遂相湯伐桀湯以費昌為御

與桀戰于鳴條之野夏師敗績桀走保三朥

今定陶也遂伐

三朶俘厥寶玉而放桀焉伊尹報于諸侯諸侯大會湯再拜而從諸侯之位曰天命無常惟歸有道三辭諸侯莫敢當乃踐天子位湯歸自夏至于大坰惟有慚德曰予恐來世以予為口實蓋以臣伐君以干戈取天下自湯始所以慚也故仲虺作誥以釋之湯為天子反桀之事遂其賢良以寬治民除其邪虐徇民所欲順天革命改正朔以建丑為正月或言湯作歷不以正月朔旦為節更用十一月冬至為元首至周從之服色尚白朝會

以畫社用栢或云社用石葬植松牲用白以白為徽號
朝燕服皐冠而縞衣十二寸為尺初置二相以伊尹仲
虺為之湯謂伊尹曰每勤諸侯遠獻方物吾欲因其地
之所有易得不貴乃命伊尹為獻令初作園取禽獸以
奉宗廟簡士卒習射御以戒不虞海外肅慎北發渠搜
氏羌來服民無食者以莊山之金鑄幣而賑之自伐桀
之後七年大旱洛圻川竭煎沙爛石太史氏曰當以人
禱湯曰請雨為民也若以人禱吾自當之乃齊戒翦髮

斷爪素車白馬嬰以白茅身為犧牲禱於桑林之社持
三足鼎祝諸山川曰勿以予一人之不敏俾上帝鬼神
傷民之命仍以六事自責曰政不節與民失職與宮室
崇與婦謁盛與苞苴行與讒夫昌與言未訖雨大作方
數千里命伊尹作樂曰大濩修九韶六列聞宮聲使人
溫良而寬大聞商聲使人方廉而好義聞角聲使人惻
隱而仁愛聞徵聲使人樂養而好施聞羽聲使人恭謹
而好禮湯令未命之士不得朱軒及飛軫不得乘飾車

駢馬衣文繡命然後得以旌有德湯二十七征而天下

服在位十三年

元年庚戌

年百歲葬濟陰有莘氏生太丁外

丙仲壬太丁為太子早卒而立其弟外丙商人禘舜而

祖契郊冥而宗湯上甲微

皇甫謐曰微字上甲

能帥契者故報焉

臣謹按劉向別錄曰九主者有法君專君授君勞君

等君寄君破君國君三歲社君凡九品圖其形象又

按湯以水德王天下又按皇覽曰湯冢在濟陰亳縣

北東郭外三里冢四方方各十步高七尺漢哀帝建

平元年大司空御史長卿按行水災至湯冢劉向曰
湯無葬處皇甫謐曰湯即諸侯位十七年為天子十
三年百歲而崩又按湯聞伊尹賢使人請於有莘氏
不可伊尹亦欲歸湯湯娶於有莘氏乃以伊尹為媵
送女湯得伊尹祓之於廟照之以爚爨以犧稷明日
設朝而見之伊尹請湯以至味湯曰可得而為之乎
對曰君之國小不足以具之為天子然後可因說湯
以伐夏救民

帝外丙

元年癸亥

外丙在位二年崩立其弟仲壬

帝仲壬

仲一作中元年乙丑

仲壬在位四年崩伊尹立太丁之子

太甲實成湯之適長孫也

帝太甲

亦曰祖申元年己巳

太甲嗣位伊尹為之作伊訓肆命徂

后明言烈祖成湯之德以訓于王太甲既立不明伊尹

放諸桐而攝政當國以朝諸侯太甲居桐宮三年悔過

遷善十有二月朔伊尹以冕服奉嗣王歸于亳廼作太

甲三篇而申訓之伊尹既復政告老將歸又作成有一

德太甲在位三十三年廟曰太宗商家祖有功而宗有德故後世以祖宗稱之太甲崩子沃丁立

臣謹按伊訓成湯既沒太甲元年孔傳曰太丁未立而卒及湯沒而太甲立孟軻司馬遷云湯崩外丙仲壬皆即位乃及太甲與書不同劉歆皇甫謐皆從之此雖畔經亦無害若乃汲冢紀年曰商仲壬即位居亳崩其卿士伊尹放太甲于桐乃自立也伊尹即位放太甲七年太甲潛出自桐殺伊尹乃立其子伊陟

伊奮命復其父之田宅而中分之此害經之甚者也

帝沃丁

元年
壬寅

沃丁八年伊尹卒伊尹於太甲之時告老

而歸于其邑至是沃丁乃葬之于亳在湯冢之西從先王也後世尊之曰先正保衡咎單相沃丁遂訓伊尹事而作沃丁之篇沃丁在位二十九年崩弟太庚立

臣謹按孔氏傳曰沃丁以三公禮葬伊尹皇甫謐曰沃丁八年伊尹卒年百餘歲大霧三日沃丁葬之以天子禮祀以太牢親臨喪以報大德焉又按皇覽曰

伊尹冢在濟陰己氏平利鄉近於亳

帝太庚

元年
辛未

太庚在位二十五年崩子小甲立

徐廣曰
世表云

小甲太
丁弟

帝小甲

元年
丙申

小甲在位三十六年

帝王本紀云
五十七年

崩弟雍

已立

帝雍已

元年
壬申

雍已之時商道始衰諸侯或不至在位十

三年崩弟太戊立

帝太戊

元年
乙酉

太戊命伊尹之子陟為相亳有祥桑與穀

合生于朝一暮大拱或云七日大拱太戊患焉伊陟曰妖不勝德君之政無乃有闕與太戊占之曰野木生於朝國必亡於是修先王之政明養老之禮早朝晏退問疾弔喪三日而祥桑枯死三年遠方之人重譯而至者十六國是時太戊相伊陟巫咸而用臣扈伊陟贊于巫咸或言巫咸治王家有成作咸乂四篇太戊復贊伊陟于廟言弗臣也作伊陟之篇伊陟辭焉作原命之篇臣主皆賢商道復興在位七十五年崩廟曰中宗子仲丁

立

帝仲丁

元年庚子

仲丁自亳遷于囂

囂亦作敖今河南敖倉是也

藍夷為

寇仲丁征之在位十一年崩弟外壬立

帝外壬

元年辛亥

外壬在位十五年崩弟河亶甲立

帝河亶甲

元年丙寅

亶甲遷于相

今鄴都也

商復衰在位九年崩

子祖乙立

帝祖乙

元年乙亥

祖乙遷于耿

河中龍門縣南十里故耿城是也為水所圯

遷于邢

今邢州治也

或云遷于奄巫賢任職商道復興在位

十九年崩子祖辛立

帝祖辛

元年甲午

祖辛在位十六年崩弟沃甲立

帝沃甲

一作開甲元年庚戌

沃甲在位二十年崩祖辛之子祖丁

立

帝祖丁

元年庚午

祖丁在位三十三年崩沃甲之子南庚立

帝南庚

元年壬寅

南庚在位二十九年崩祖丁之子陽甲立

帝陽甲

元年辛未

陽甲之世商道衰微自仲丁以來廢適而

立諸弟弟子爭立比九世亂諸侯莫朝在位七年崩

帝王

本紀云弟盤庚立
十七年

帝盤庚

元年
戊寅

盤庚之前作都在河北水泉汚溺蕩析民

居盤庚將涉河以民遷商自成湯以來凡五遷都邑臣

民重遷而相咨怨盤庚為是諭諸侯大臣言其先祖佐

我高后成湯法則可修之事以曉衆志乃渡河治亳修

湯之德行湯之政諸侯來朝在位二十八年崩弟小辛

立

臣謹按皇甫謐曰孟子稱湯居亳與葛為鄰亳即梁

國穀熟縣也實湯之所都是為南亳又湯有景亳之
命梁國蒙縣北有亳城實湯所受命朝諸侯處是為
北亳盤庚所治亳在河南偃師是為西亳三地皆名
亳立政所謂三亳也然亳之名本在西商人初作邑
于商實上洛也後遷于亳故京兆杜縣有亳亭是也
三亳之名皆自此亳始

帝小辛

元年
丙午

小辛不能紹盤庚之業商家微矣百姓思

盤庚之治作盤庚三篇在位二十一年崩弟小乙立

帝小乙

元年丁卯

小乙在位二十年崩子武丁立

帝武丁

元年戊午

武丁為太子時學于甘盤遜于荒野盡知

民之疾苦能聳其德至于神明居憂亮陰三年不言政
事決於冢宰既免喪猶不言羣臣咸諫曰天子惟君萬
邦百官承式王言惟作命不言臣下罔攸稟令王作書
以誥曰以予正于四方予恐德弗類茲故不言恭默思
道夢帝賚予良弼其代予言乃審所夢之象使圖其形
以求於天下而得說焉說築室於傅巖之野惟肖厥象

武丁見之與語而知其賢爰立作相而命之氏蓋因所
居也故曰傳說惟說總百官朝夕納誨于王又與同僚
協心佐治以成商家中興之業武丁開先祖之府取其
明法以為君臣上下之節武丁祀成湯之明日有飛雉
升鼎耳而雉武丁患其不祥其賢臣祖己作訓于王言
天之所監在民王能愛民無非天祚武丁又責躬思道
三年編髮重譯來朝者六國自是服章多用翟羽孔子
曰吾於高宗彤日見修德而報之疾也苟由其道致其

仁則遠方歸德焉鬼方恃固而擾諸夏武丁伐之三年乃克自是內外無患在位五十九年崩祖己嘉武丁之祥雉為立廟為高宗子祖庚立

臣謹按書大傳曰湯之後武丁之前王道不振桑穀俱生于朝七日而大拱武丁問諸祖己祖己曰桑穀野草而生于朝朝必亡武丁懼側身憂行思先王之道興滅國繼絕世舉逸民明養老之道三年之後重譯而朝者六國又按劉向曰高宗承商敝而起盡諒

陰之哀天下應之既獲安定而怠於政乃有桑穀之異又劉向著說苑以太戊武丁時俱有桑穀異又按呂氏春秋湯時穀生於廷比旦而大拱

臣謹按孔安國曰傅氏之巖在虞虢之間通道所經有澗水壞道常使胥靡刑人築其道說賢而代胥靡之築以售食焉又按皇甫謐曰高宗夢天賜賢人胥靡之衣蒙之而來曰我徒也姓傅名說得我者豈徒也哉武丁寤而推之曰傅者相也說者懽說也天下

當有相我而說民者哉明日審夢以示百官皆非也
乃使百工寫其形象求諸天下果見築者胥靡衣褐
帶索執役于虞號之間傳巖之野名說以其得之傳
巖謂之傳說然謚既曰姓傳名說又曰得之傳巖謂
之傳說何也又按墨子曰傳說居北海之州圜土之
上衣褐帶索售築於傳巖之城臣按築者築室也依
巖築室其隱者與懷才抱道應時而起非役徒也以
士君子之身何自苦而衣胥靡之衣為刑人之事乎

帝祖庚

元年

祖庚在位七年崩弟辛甲立

帝辛甲

亦曰祖甲
元年甲午

無逸言祖甲者太甲也在位十六年

崩子廩辛立

臣謹按鄭康成曰祖甲之兄祖庚賢武丁欲廢兄立

弟祖甲以為不義逃於民間周語曰帝甲而亂七世

而隕

帝廩辛

亦曰馮辛
元年庚戌

廩辛在位六年崩弟庚丁立

帝庚丁

元年
丙辰

庚丁在位六年

帝王本紀
曰十一年

崩子武乙立

帝武乙

元年
壬戌

武乙復去亳都河北中國微弱東夷盛彊

分遷淮岱漸居中土武乙無道為偶人謂之天神令人

為行與之博天神不勝僂辱之為革囊盛血仰而射之

命曰射天獵於河渭之間震死在位四年

竹書紀年曰
武乙三十五

年周
俘狄

子太丁立

帝太丁

元年
丙寅

太丁在位三年

紀年曰
十一年

崩子乙立

帝乙

亦曰辛乙
元年己巳

乙之子三人長曰微子啟次曰仲衍季

曰紂啟母賤而立紂焉適故也或言三人同母母本妾

也以為后生紂紂尚幼乙及后謂啟賢欲以為太子太史據法而爭之曰廢適立庶不可乙在位三十七年商家日微崩少子紂立

紂

亦曰辛亦曰受亦曰受德元年丙午

紂資辨捷疾見聞甚敏材力過人

手格猛獸知足以拒諫言足以飾非矜人臣以能高天下以聲以為皆出已之下始為象箸箕子歎曰彼為象箸必為玉杯玉杯象箸必不盛土簋而羹菽藿必不衣短褐而舍於茅茨之下將錦衣九重高臺廣榭稱此以

求之天下不足其求矣致遠方珍怪之物侈興馬宮室之漸自此始箕子者紂之諸父也或言紂之庶兄名胥餘紂伐有蘇氏有蘇氏以妲己女紂紂惑之言無不聽所好者貴所惡者誅使師延一作涓作朝歌北鄙之音北

里之舞靡靡之樂造鹿臺而為瓊室玉門臺三里高千

尺七年乃成

其臺今在朝歌城中

厚賦斂以實鹿臺之錢而盈鉅

橋之粟益收狗馬奇玩充物宮室以人食獸廣沙邱苑臺多取鳥獸之異者寘其中大聚樂戲於沙邱以酒為

池以糟為邱縣肉為林使男女僕相逐其間大宮百里
宮中九市與崇侯費中戲於離宮以百二十日為一夜
謂之長夜飲車行酒騎行炙以繩羈人頭引就酒池醉
而溺死紂醉而忘其日辰甲子問左右皆不知問箕子
箕子曰一國失日天下其危乎國人不知吾獨知之吾
其危乎亦以醉不知百姓怨望諸侯有畔者妲己以為
威不立耳乃說紂重刑辟初為熨斗而然之使人舉熨
更用銅柱而膏之焚於其下俾囚辟緣柱以資妲己之

笑名曰炮烙之刑紂以西伯昌九侯鄂侯為三公九侯

亦謂鬼侯

今鄴縣有九侯城是也鄂徐廣謂一名邦野王縣有邦城今懷州治然晉地亦有名鄂者

九侯之女美納之於紂其女賢而不淫紂惡而殺之醢

九侯鄂侯爭之脯鄂侯又剖孕婦而視其胎斮朝涉之

脛而視其髓西伯聞而竊嘆崇侯虎以告且曰昌仁而

有謀太子發勇而不疑中子旦恭儉而知時冠雖弊禮

加頭履雖鮮位在足彼將易置焉請及其未成形圖之

紂於是囚西伯於羑里

今河內湯陰

周之臣散宜生南宮适

闕天患之而問於呂尚三子舊學於尚尚知其賢相與
見西伯美里乃求有莘之美女驪戎之文馬有熊之九
駟西海濱之白狐林陵怪獸江淮大貝因嬖臣費中而
獻之散宜生趨而進曰西藩之臣昌命其行人敢効其
寶以免其辜紂大說曰一物足以釋其辜況多乎西伯
歸而獻洛西之地赤壤之田方千里請除炮烙之刑紂
許之仍賜弓矢斧鉞得專征典治南國江漢汝潁之諸
侯率循西伯之令於是陽為玉門築靈臺列侍女撞鐘

鼓為樂紂聞之曰西伯改行吾無憂矣西伯陰修德行
善諸侯多畔紂而歸周紂用費中為政費中善諛且嗜
利又用蜚廉惡來革蜚廉善走惡來革者蜚廉之子也
有力手裂虎兕善讒譏商容賢者棄而不用自此諸侯
日益疏惟黎國為近於郊畿之間附紂周人伐黎商之
賢臣祖伊恐奔告于紂紂曰我生不有命在天於是作
西伯戡黎西伯九年卒太子發立是為武王紂之淫虐
滋甚微子數諫不從欲死與亡未能決問於太師疵少

師彊對曰死而能安社稷利國家不恨為死死不能安社稷利國家不如亡箕子又諫不聽人曰可以去矣對曰知不用而言之不智也殺身以彰君之惡不忠也為人臣而自說於民吾不忍為也乃被髮佯狂為奴隸鼓琴以見志傳之者為箕子操紂囚之王子比干紂之諸父也曰為大臣者不諫非忠也不死非勇也諫三日不去紂曰吾聞聖人之心有七竅乃剖比干之心而視之或言剗剔孕婦即比干之妻也微子曰父子有骨肉之

恩而臣主以義屬父有過子三諫不聽則隨而號之君有過臣三諫不聽義可以去矣太師少師抱其祭器樂器奔周内史向摯載其圖法亦奔周武王問太公曰仁者賢者亡矣商可伐乎對曰先謀後事者昌先事後謀者亡夏條可結冬冰可折時難得而易失初武王使人候商報曰讒勝良王曰未也又往報曰賢者出走王曰尚未也又往報曰民不敢誹怨矣王曰嘻遽告太公對曰刑勝故也其亂至矣往年武王東伐至孟津觀兵於

商郊而還惟十有三年春大會於孟津二月甲子至商郊與紂戰於牧野紂兵敗乃走入宣室登鹿臺衣其寶玉就焚武王持太白之旗以麾諸侯諸侯畢拜武王揖之諸侯從入商國至紂死所王自射之三發而後下車以輕劒擊之以黃鉞斬紂之首而揭之大白之旗親射惡來之口紂之嬖寵如妲己者二人皆自殺王又射三發擊以劒斬以元鉞而揭其首於小白之旗武王命周公訪商之遺老而知民之所欲乃修盤庚之政親商如

周視仇如戚裂鼓折枹弛弓絕枯去舍宿露解劔帶笏
商人忘亡紂在位三十三年身滅國亡太史公云成湯
之後分封以國為姓有殷氏來氏宋氏空桐氏稚氏北
殷氏目夷氏然目夷公子魚之字也安得為國空桐氏
稚氏並非國號

臣謹按高氏云周武王為天子始貶帝號稱王今考
左傳云宋祖帝乙鄭祖厲王司馬遷本紀夏商皆稱
帝周始稱王又按紂在位以來夷羊在牧梓化為松

有燕口爪俱句天雨肉雨血于亳大旱大水河竭山
鳴兩日見天火焚宮宮中鬼夜哭女化為男龜生毛
兔生角紂嘗六月獵於西土發民逐獸諫者曰長育
之時不可逆天道絕地德君踐一日之苗民失百日
之食紂殺之後數月大風飄牛馬發屋拔木飛揚數
十里有雀生鷗占曰以小生大國家王而名昌紂聞
是占而益怙又按武王平商有二虜問之曰是國有
妖乎一虜曰晝見星天雨血雨灰雨石大如甕六月

雨雪一虜曰商有大妖此不與也子不聽父弟不從
兄信者為欺欺者為忠婦人為政君子在野小人在
位急令暴取以人餒虎田獵畢弋走狗試馬不避風
雨好治池臺宮室百里之宮七十三所坐起以金鼓
無長幼貴賤無禮義忠信無斗尺權衡此妖之大者
也武王貴其言再拜

右商之世起湯元年庚戌終紂三十三年戊寅

三十君十七世六百二十九年

商歷曰起丙戌
終癸亥四百五

十八年汲冢紀年曰二
十九王四百九十六年

通志卷三上

欽定四庫全書

通志卷三下

宋 右廸功郎鄭樵漁仲撰

三王紀第三下

周

棄曰后稷帝嚳之子也其母有邠氏女曰姜原姜原為
帝嚳元妃因出野見巨人跡心忻然說欲踐之踐之而
身動如孕者居期而生子以為不祥棄之於隘巷牛羊

過者皆避不踐或腓字之徙置之平林會伐林木者收而生之又遷而寘於渠中水上飛鳥以其翼覆薦之姜原以為神遂取養長之初欲棄之故名曰棄棄為兒時忼如巨人之志其遊戲好執麻菽麻菽美及為成人遂好耕農相地之宜穀者稼穡焉民皆效之堯聞而舉為農師民得其利舜命之曰棄黎民阻飢汝后稷播時百穀封於邠今武功縣號曰后稷別為姬姓后稷之興在陶唐虞夏之際皆有令德與契益伯夷佐禹平水土各

有功稷勤於百穀而山死子不窋襲位不窋末年夏后

氏政衰去稷不務不窋失其官奔戎狄之間卒子鞠立

鞠亦曰鞠陶

卒子公劉立公劉雖在戎狄之間復修后稷之

業務耕種行地宜遷邑于豳

今邠州三水西南三十里有古豳城邠即豳也

乃

自漆沮渡渭取材用行者有資居者有積百姓懷之多

徙歸焉周道自此而興詩人樂其德而歌之卒子慶節

立或言慶節國于豳卒子皇僕立卒子差弗立卒子毀

隃立卒子公非立

公非亦曰辟方

卒子高圉立高圉能率后稷

者也故周人報焉卒子亞圉立

亞圉亦曰雲都

卒子公叔祖類

立

公叔祖類亦曰太公叔類亦曰組紺諸蓋

卒子古公亶父立古公當殷武

乙之時王綱不振能復修后稷公劉之業積德行義國

人戴之薰粥來攻古公事之以皮幣犬馬珠玉菽粟貸

財皆不得免焉復欲其土地與民古公曰與之耆老曰

君不為社稷乎曰社稷所以為民也不可以所為亡民

也耆老曰君不為宗廟乎曰宗廟吾私也不可以私害

民也夫有民立君將以利之與人之兄居而殺其弟與

人之父居而殺其子以其所養害其所養吾不忍也民之在我與其在彼何異二三子何患乎無君杖策而去率其私屬去豳渡漆沮踰梁山邑于岐山之下

今鳳翔府岐山

是也始改國號曰周

或言后稷始封于邠即號曰周

豳人曰仁人之君不

可失也舉國扶老攜幼從之者二千乘一止而成三千戶之邑鄰國聞其仁而多歸之古公乃貶戎狄之俗營築城郭室屋而居作五官有司曰司徒司馬司空司士司寇民歌樂之頌其德古公娶有邠氏女曰太姜美而

賢生太伯仲雍季歷或言太姜生少子季歷季歷娶摯國之女曰太任亦賢生昌有聖瑞昌在母不憂在傳不

勤處師不煩事父不怒友于二號

二號者昌之二弟號仲號叔

古公

曰我世當有興者其在昌乎太伯仲雍知古公欲立季歷以傳昌乃二人亡如荆蠻文身斷髮太伯自號句吳

荆蠻義而歸者千餘家古公卒

或言百二十歲

武王王天下追

號古公為太王太王能率稷者也故周人報焉季歷

亦曰

季公篤於行義諸侯順之商益衰公季以功多受圭瓚

鬯之賜九命作伯號西伯得專征乃伐西落鬼戎俘其
主以歸公季卒

年百歲

子昌立武王王天下追號公季為

王季

臣謹按王肅曰太伯見王季生文王知天命之有在
去而適吳太王沒而不反或言古公將卒謂季歷曰
我死汝即推兩兄彼即辭汝有義而安矣古公卒季
歷之吳召二兄相從而歸羣臣欲立之太伯仲雍以
先君之命不可復如荆蠻

文王昌襲公季為西伯及武王王天下追諡文王文王
遵后稷公劉之業則古公公季之法篤仁優老慈少禮
賢日中不暇食以待士士以此多歸之伯夷叔齊兄弟
辭國而歸文王曰吾聞西伯善養老盍歸乎來太顛閎
夭散宜生南宮适鬻子辛甲大夫之徒皆歸之鬻子名
熊時年九十西伯曰子老矣鬻子曰捕虎逐麋臣已老
矣坐而籌策臣尚少也封於楚辛甲故商之臣事紂蓋
七十五諫不聽而去至周召公與語賢之以告文王文

王自迎之封於長子文王之為政也詢于八虞八虞者
周之八士皆為虞官咨于二虢以為卿士度於閼天謀
於南宮諏於蔡原訪於辛甲重以周召畢榮是以能治
紂用崇侯虎之讒囚文王于羑里於是究明易道或言
始作彖象文王被囚七年諸侯皆從之囚紂懼而歸之
日譖西伯者崇侯虎也文王之行信於諸侯諸侯皆來
決平虞芮之君爭田既久俱如周質焉入其境耕者讓
畔行者讓路入其邑男女異路班白不提負入其朝士

讓為大夫大夫讓為卿虞芮之君皆有慚色曰吾所爭

周人所耻吾曹小人不可以履君子之庭俱讓而去以

其田為閒田天下聞之一時歸周者三十餘國

或言四十餘國

諸侯皆曰西伯蓋受命之君文王自是更稱元年是時

商道不宏諸侯多事文王文王一年斷虞芮之質二年

伐邠三年伐密須四年伐犬夷五年伐黎

黎亦謂之耆

六年

伐崇七年而崩

史記亦以斷虞芮之訟為受命之年明年伐犬戎明年伐密須明年敗耆國明年

伐邠明年伐崇侯虎明年西伯崩雖所伐有差而同為七年崩然書明言九年大統未集安得為七年崩也

自虞芮之訟決諸侯皆取質於西伯西伯為是東
征西伐以討不平伯者之事也安得為受命乎 初文

王伐邾問太公曰孰可伐太公曰密須可管叔曰其君
彊明伐之不可太公曰先王伐逆不伐順伐險不伐易
遂自阮徂共而及密須密須之人自縛其君而歸文王
文王伐崇宣言曰崇侯虎蔑侮父兄不敬長老聽訟不
矜分財不均民力盡不得衣食予將征之乃伐崇令無
殺人無壞室無塞井無伐木無掠六畜不如令者不赦
三旬而崇不降退修教而復伐之因壘而降文王行於

野見枯骨命吏瘞之吏曰此無主矣文王曰有天下者
天下之主有一國者一國之主吾即其主也以棺衾而
葬之天下聞之曰西伯之澤及枯骨況於人乎或言文
王為沼而得枯骨葬之文王問太公曰為天下若何對
曰王者之國富民伯者之國富士僅存之國富大夫無
道之國富倉府是謂上溢而下漏文王曰善遂發倉府
賑窮獨文王之業既光大乃遷于豐

豐今在永興鄆縣
東南有豐水焉

去岐山三百餘里分岐邦周召之地為周公旦召公奭

之采邑天下三分有其二猶率殷之叛國以事紂是時
五星聚於房赤雀銜書止于屋又有黃龍元龜白魚赤
雀負圖銜書之應文王九年實紂之三十年也文王寢
疾五日謂太子發曰見善而弗怠時至而勿疑去非而
勿憚三者道之所止也太子再拜受之文王在位五十
年崩

呂氏春秋曰四十一年韓嬰曰五十一年

年九十七葬于畢

今長安縣西畢陌是

也文王娶有莘氏之女曰大妣號文母文王治外文母

治內文王之業賴文母之助為多焉大妣十子長伯邑

考次武王發次管叔鮮次周公旦次蔡叔度次曹叔振

鐸次邠叔武次霍叔處次康叔封季曰聃季載

皇甫謐曰文王

生伯邑考次武王次管叔次蔡叔次邠叔次霍叔次周公次曹叔次康叔次聃季名同國同而次異發旦

尤賢左右文王故文王舍伯邑考而立武王也又有滕

毛部雍畢原豐邠八國皆文王子也文王身長十尺十

二而冠十三而生伯邑考焉

臣謹按諸侯即位而再改元者或有焉史記秦惠王十四年更為元年汲冢紀年魏惠成王三十六年改

元稱一年何必受命而後改元也又按泰誓之序曰
十有一年武王伐商其書曰十有三年春大會于孟
津洪範亦曰十有三祀王訪于箕子則知武王伐商
在十三年由泰誓序之說以三為一致後之說者紛
紛也又按文王即位之八年六月寢疾五日而地震
東西南北不出郊圻有司曰地震為人主也羣臣皆
恐欲跣其城以移之文王曰天之見妖以罰有罪我
若有罪若何逃罰率德改行其可免乎於是謹其禮

秩皮革以交諸侯飭其辭令幣帛以禮俊士頒其爵
級田疇以賞有功未幾疾愈又按文王囚於羑里厄
憤而歌曰商道溷溷寢濁煩兮朱紫相合不別分兮
迷亂聲色信讒言兮炎炎之虐使我愆兮幽之牢寘
由其言兮遇我四國憂勤勤兮又按文王與呂尚語
而大說曰吾先君太公曰當有聖人適周周以興無
乃子邪吾太公望子久矣故號太公望然此臆說也
名號之義不如是且周之先公無號太公者又何望

焉又按文王以伯邑考質於商為紂御紂曰吾聞聖人不食其子乃烹伯邑考以羹遺文王文王得而食之紂曰孰謂昌為聖人此皆誕語也

武王即位太公望為師周公旦為輔召公畢公之徒為左右修文王之業文王之十一年

或言九年

東觀兵至于孟

津為文王木主載之車中武王稱太子發奉先君東伐示不敢專也乃告司馬司徒司空遂興師太公左杖黃鉞右秉白旄誓衆渡河曰總爾行伍與爾舟楫後至者

誅武王渡河中流白魚躍入王舟中武王俯取以祭既
渡有火自上而下至于王屋流為鳥其色赤其聲魄云
是時不期而會者八百諸侯皆曰紂可伐矣武王曰汝
未知天命乃還師武王出見暵人陰之於樾下左擁而
右扇之天下聞之莫不懷其德紂之淫虐滋甚武王徧
告諸侯曰今商如是不可以不畢伐遂率戎車三百乘
虎賁三千人甲士四萬五千人將行卜戰龜焦不兆著
立而折筮又不吉風雨暴至折蓋

太公因其形而制曲
蓋今猶存遺制焉

羣臣盡懼太公曰枯骨朽草不踰人矣乃焚龜棄蓍帥
衆先進武王從之行之以兵忌東面而逆太歲魚辛
諫曰歲在北方不北征武王不從至汜而泛將涉河陽
侯之波逆流而擊舟風雨晝暝相視不見武王瞋目而
撓之風霽而波靡十有三年一月戊午師渡孟津前歌
後舞次于河朔諸侯以兵車會者四千乘武王乃作泰
誓以告于衆曰今商王受弗恭于天降災下民沈湎冒
色敢行暴虐罪人以族官人以世惟宮室臺榭陂池侈

服以殘害于爾萬姓焚炙忠良剗剔孕婦皇天震怒命
我文考肅將天威大勲未集肆予小子發以爾友邦冢
君觀政于商惟受罔有悛心同力度德同德度義受有
臣億萬惟億萬心予有臣三千惟一心商罪貫盈天命
誅之予弗順天厥罪惟鈞爾尚弼予一人永清四海明
日王乃大巡六師明誓衆士曰今商王受自絕于天結
怨于民斲朝涉之脛剖賢人之心崇信姦回放黜師保
屏棄典刑囚奴正士郊社不修宗廟不享作奇技淫巧

以悅婦人上帝弗順於是降喪爾其孜孜奉予一人恭
行天罰軍至河水紂使膠鬲候周師膠鬲見武王而問
曰西伯將焉之王曰將之殷膠鬲曰何日至王曰甲子
膠鬲去而雨大作皆曰不可行王曰吾令膠鬲以甲子
報其主矣遂行王戰係解五人御於前莫肯為王結之
皆曰臣所以事君非為結韉也王乃釋旄鉞俯而自結
二月甲子朝至于商郊牧野乃誓武王左杖黃鉞右秉
白旄以麾曰嗟我友邦冢君司徒司馬司空亞旅師氏

千夫長百夫長及庸蜀羌髳微盧彭濮人稱爾戈比爾
千立爾矛予其誓王曰古人有言牝雞無晨牝雞之晨
惟家之索今商王受惟婦言是用惟多罪逋逃之人是
信是使婢暴虐于百姓以姦宄于商邑今予發惟恭行
天之罰今日之事不愆于六步七步乃止齊焉夫子勗
哉不愆于四伐五伐六伐七伐乃止齊焉勗哉夫子如
虎如貔如熊如羆于商郊勗哉夫子爾所不勗其于爾
躬有戮陳師牧野紂亦發兵七十萬以距之武王命師

尚父與百夫致師以大卒馳紂師紂師雖衆無關心惟欲武王亟入武王馳之紂兵皆叛倒戈以開周師紂走而自燔武王持大白之旗以麾諸侯諸侯畢拜武王乃揖諸侯諸侯從王入商國商之百姓咸待于郊觀周師之入見畢公至商民曰是吾新君也商容曰非也視其為人嚴乎將有急色故君子臨事而懼見太公至民曰是吾新君也商容曰非也其人虎據而鷹趾當敵將衆威怒自倍見利即前不顧其後故君子臨衆果於進退

見周公至民曰是吾新君也商容曰其人忻忻休休志在除賊是非天子則周之相國也故聖人臨衆不惡而嚴是以知之見武王至民曰是吾新君也商容曰然聖人爲海內討惡見惡不怒見善不喜顏色相副是以知之商人皆再拜稽首武王亦答拜武王乃出復軍皇皇若天下之未定問太公曰奈商之士衆何對曰愛其人者兼其屋上之烏憎其人者盡其儲胥咸劉厥敵靡使有餘王曰不可問於召公對曰有罪者戮無辜者宥王

曰不可問於周公對曰使各居其居田其田無變新舊
惟仁是親王曰善哉明日除道及紂宮百夫荷罕旗以
先驅叔振鐸奉陳常車周公旦秉大鉞畢公秉小鉞以
夾武王散宜生太顛閎夭皆執劔以衛既入立于社南
毛叔鄭奉明水康叔封奉布茲召公奭贊采師尚父牽
牲尹佚奉筴祝柴于上帝祈于社朝于湯廟乃出設奠
於牧室追至三代以古公為太王公季為王季諡其父
曰文王祀先公以天子之禮改文王之十三年己卯為

元年以建子為正月至於授民時巡狩祭享兼用夏正
建寅焉色尚赤社用栗葬用栢牲用騂以赤為徽號朝
燕服冕而元衣八寸為尺其樂曰大武武王踐阼三日
師尚父道丹書之言曰敬勝怠者昌怠勝敬者亡義勝
欲者從欲勝義者凶以仁得之以仁守之其量百世以
仁得之以不仁守之其量十世以不仁得之以不仁守
之其世必傾王聞其言書之於席几鑑盥盤楹杖帶觴
豆尸牖履劔弓矛皆為銘焉微子持祭器造於軍門面

縛銜壁與櫬武王親釋其縛受其壁而被之焚其櫬禮而命之使復其位乃三分商之畿內封紂子武庚祿父為諸侯以續商祀治商之餘民恐其變也命管叔尹鄘蔡叔尹衛相祿父居邲是為三監乃命召公釋箕子之囚命畢公釋百姓之囚表商容之間商容賢者也紂棄而不用隱於太行武王以為三公固辭不受命命南宮适散鹿臺之錢發鉅橋之粟賑貧窮起幽側放傾宮之女命史佚展九鼎寶玉命閔夭封比干之墓命宗祝享

祀于軍商民大悅曰王於死者猶封其墓況生者乎亡者猶表其閭況存者乎王於財也聚者猶散之肯復藉乎王於色也在者猶歸之肯復求乎武王已平商亂罷兵西歸四月至于豐丁未祀于周廟越三日庚戌柴望大告武成薦俘馘于太廟封諸侯班宗彝分商之器物武王追思先聖乃褒封神農之後於焦

今陝州有焦城

黃帝之

後於祝

今淄川

帝堯之後於薊

今幽州薊縣

帝舜之後於陳

今陳州宛邱

大禹之後於杞

今開封雍邱

於是封功臣謀士以師

尚父為首封於營邱曰齊

今齊州臨淄

封弟周公旦於曲阜

曰魯

今兗州仙源

召公奭於燕

今幽州

叔鮮於管

今鄭州管城

叔度

於蔡

今蔡州上蔡

叔振鐸於曹

今廣濟定陶

叔武於邲

今濮州雷澤

叔

處於霍

今晉州霍邑

康叔封聃季載皆少未封其餘各以次

受封立七十一國封兄弟之國十五人同姓之國四十

人周之子孫不狂惑者皆得為諸侯惟周公留佐周武

王徵九牧之君登幽之阜以望商邑王至于周自夜不

寐周公旦即王所曰曷為不寐王曰惟天不饗商自發

未生於今六十年麋鹿在牧蜚鴻滿野天不饗商乃今
有成我未定天保何暇寐我南望三塗北望岳鄙顧瞻
有河越視伊洛毋遠天室營周居于洛而後去縱馬於
華山之陽放牛於桃林之野偃干戈振兵釋旅霧鼓旗
甲兵藏之府庫示天下不復用也武王已克商虛已而
問箕子商所以亡箕子不忍言乃問以天道箕子陳洪
範武王封之於朝鮮而不臣也箕子嘗朝周過故商虛
感宮室生禾黍而作麥秀之詩曰麥秀漸漸兮禾黍油

油彼狡童兮不與我好兮商民聞之皆流涕後二年武

王有疾天下未集羣臣懼而卜之周公乃被齊自為質

告太王王季文王欲身代武王占之曰吉周公納冊于

金縢之匱中明日有瘳武王自豐遷于鎬

鎬在今永興鄠縣東南豐

文王都也自岐遷焉豐在豐水之南鎬在豐水之東豐鎬相去二十里

在位七年崩年九

十三葬于畢

封禪書云武王克商二年天下未定而崩皇甫謐曰武王元年乙酉六年庚寅崩皇

覽曰文王武王周公冢皆在長安鎬聚東社中也

太子誦立是為成王周人禘

嚳而郊稷祖文王而宗武王文武二廟蓋百世不遷云

臣謹按周以木德王天下又按皇甫謐曰武王伐紂之年夏四月乙卯祀于周廟將帥之士皆封諸侯者

四百人

成王即位

元年丙戌

周公位冢宰以天下初定王年少恐諸

侯畔周公攝政當國南面黜廢以朝諸侯成王冠周公

命史雍曰辭達而已勿多也史雍頌曰近於民遠於佞

近於義普於時惠於財任賢使能周公曰善成王朝于

祖廟以見諸侯管叔蔡叔羣弟疑周公攝政恐不利於

成王奄君告武庚祿父曰此百世之時也請舉事管蔡挾武庚率奄淮夷叛周公奉王命興師東伐周公居東二年罪人斯得誅武庚管叔放蔡叔與之車七乘徒七十人降霍叔于庶人三年不齒遂定奄及淮夷東土以寧諸侯復宗周分殷之餘民為二以其一封微子啓代殷後國於宋又以其一封康叔於衛又封季載於聃實周公之季弟也又封武王之四子於晉邠應韓晉國得嘉禾異畝合穎獻之成王成王以歸周公于兵所周公

受禾東土旅天子之命作嘉禾周公遣使察民之有飢
寒者獄訟之有寃者賢才之有幽滯者歸而以告周公
周公於其君來朝也揖而問之百姓聞之曰何居之深
而見之明也六年周公朝諸侯於明堂制禮作樂頒度
量而天下大治交趾之南有越裳氏重三譯而獻白雉
周公曰德澤不加君子不饗其贄政令不施君子不臣
其人譯曰吾國之黃耆曰天無烈風淫雨海不揚波三
年矣意中國有聖人於是來朝周公致薦於宗廟使者

述其歸途周公錫以駟車五乘皆為司南之制使者載之由扶南林邑海際暮年而至其國故指南車常為先導示服遠人以正四方周公行政七年成王長周公反政北面就羣臣之位成王欲紹承武王之志乃使召公先相宅于洛邑周公復申視而卒營築謂之王城

今河南縣

也 是為東都方千七百二十丈郭方十七里南繫于洛水北因于邙山故亦謂之邙鄩遷商之九鼎而居之卜世三十卜年七百乃制郊甸方六百里因西土為方千

里分為百縣縣有四郡郡有鄙以東都為天下之中四方朝貢道里均焉周公又營成周

今洛陽縣

遷商之頑民初

周公避管蔡流言之難居東思公劉太王居豳之事以比序已志及成王迎之攝政致太平其出入也一德不回純似公劉太王太師因述其志主於豳公之事故為豳風成王既伐東夷肅慎來賀王賜榮伯作賄肅慎之命虞夏商之幣金為三品或黃或白或赤或刀布或龜貝周制以商通貨以賈易物太公立九府圜法

周官有太府玉

府內府外府泉府天府職內職幣
職金皆掌貨幣之官故曰九府

黃金方寸重一斤錢

圜方輕重以銖布帛廣二尺二寸為幅長四丈為疋
故曰寶於金利於刀流於泉布於布束於帛周公為太
師召公為太保畢公為太傅召公以周公嘗攝王政不
宜留在王朝復列臣職其意不說周公陳已意作君奭
以告之衛康叔聃季載皆有馴行周公言於王舉康叔
為司寇賜寶玉祭器以彰有德季載為司空各效其能
餘五叔無官但有爵土而已

以非材能者不可任以官也

初降霍叔

為庶人後三年復其舊封成王之時咸陽雨金末年四月甲子王疾大漸懼太子釗之不任乃命召公畢公率諸侯相太子而立之或言召太保奭芮伯彤伯畢公衛侯毛公率百官相太子而立之

彤姒姓
乙丑王崩在位
餘姬姓

三十年通周公攝政為三十三年

鄭元曰成王二十八年或云四十七年

召公畢公以太子見于先王廟申告以文武為王業之不易務節儉毋多欲以篤信臨之作顧命

臣謹按鄭元曰周公避居之初是武王崩後三年成

王生十三年矣居東二年成王年十四矣迎周公返而居攝成王年十五矣七年致政成王年二十一矣故金縢注云文王十五生武王九十七而終終時武王八十三矣於文王受命為七年後六年伐紂後二年有疾瘳後二年崩崩年九十三矣周公以武王崩後三年出五年秋復返居攝四年作康誥五年作召誥七年作洛誥伐紂至此十六年也作康誥時成王年十八洛誥時年二十一也即政時年二十二然則

成王以文王終明年生也又按王肅金縢注云文王十五而生武王九十七而終時受命九年武王八十三年矣十三年伐紂明年有疾時年八十八矣九十三而崩以冬十二月其明年稱元年周公攝政遭流言作大誥而東征二年克武庚殺管叔三年而歸制禮作樂出入四年至六年而成七年營洛邑作康誥召誥洛誥致政成王然則文王崩之年成王已三歲武王八十一而生成王武王崩時成王已十三周公攝

政七年而致政成王年二十也明年即政年二十一也又按尚書大傳叙周公居攝曰一年救亂二年克商三年踐奄四年建侯于衛五年營成周六年制禮作樂七年致政又按左傳曰成王定鼎于郊鄩卜世三十卜年八百汲冢紀年曰西周二百五十七年通東周徧合七百之數三統歷西周三百五十二年并東周八百餘年

康王

元年
癸亥

即位徧告諸侯宣告文武之業以申之乃朝

諸侯於鄴宮成康之際天下安寧刑錯四十餘年不用
康王命作策畢公分居里成周郊作畢命康王在位二
十六年崩年五十七子昭王瑕立

昭王之時

元年
巳丑

有光五色貫紫微井水溢是時王道衰

諸侯擅相征伐荆楚不朝王南征濟漢水漢濱之人以
膠船進王中流膠液船解王及祭公沒焉其崩不赴告

諱之也在位五十一年

皇甫謐曰在位
二十三年三十五

子穆王滿立

穆王即位

元年
庚辰

春秋已五十矣王室衰微穆王閔文武

之道缺乃命伯固申戒太僕作固命王寵盛伯之女盛
姬為之築重壁之臺怠於政治徐夷作亂帥九夷以伐
宗周西至河上穆王患其熾也乃分東之諸侯命徐子
主之徐子嬴姓處潢池之東地方五百里行仁義通溝
陳蔡之間欲舟行上國得朱弓朱矢以為天瑞自號偃
王陸地而朝者三十六國臯陶之裔曰造父以善御幸
於穆王王得八駿日行千里使造父御之欲車轍馬跡
周於四荒八極西與王母宴于瑤池作白雲黃竹之歌

樂而忘歸聞徐偃王偕竊復御八駿長驅而還使造父告楚令伐徐王孫厲謂楚子曰徐王好行仁義其志大矣君若不伐楚必事徐楚子曰若有道不可伐對曰大伐小彊伐弱猶石之投卵虎之噬豚也楚子於是伐徐偃王不忍鬪故敗乃北走鼓城東山下民從之者以萬計因名其山曰徐山徐子將死曰吾為不忍以至於此王將征犬戎祭公謀父諫曰先王耀德不觀兵夫兵戢而時動動則威觀則玩玩則無震武王致戎于商牧非

務武也勤恤民隱而除其害自其君大畢伯士之終也

大畢伯士犬戎氏之二君

犬戎氏以其職來王今天子曰予必不享

征之無乃廢先王之訓而王幾頓乎王不聽遂征之獲

四白狼四白鹿以歸遷戎于太原自是荒服不至王享

國百年耄荒諸侯有不睦者甫侯為相言於王修刑辟

命之曰甫刑王起六師至于九江伐楚會諸侯於塗山

在位五十五年崩年百五歲子共王繫扈立

共亦作恭

共王

元年乙亥

共王游於涇上密康公從有三女犇之其母

曰必致之王夫獸三為羣人三為衆女三為粦夫粦物之美也衆以美物歸女而何德以堪之王猶不堪況爾小醜乎小醜備物終必亡康公不獻一年王滅密共王能庇昭穆之闕在位十年崩

皇甫謐曰在位二十五年年八十四或云在位十二

年子懿王薨立

懿王

元年
乙酉

之時王室遂微詩人作刺紀侯譖齊哀公于

王王烹之王嘗居大邱其地與鎬京相近有離宮在焉

懿王在位二十五年崩

皇甫謐曰在位二十五年五十年

共王弟辟方立

是為孝王

孝王

元年庚戌

之時大雨雹牛馬死江漢水召秦非子使主

馬汧渭之間馬大蕃息孝王在位十五年崩年六十五

懿王子燮立是為夷王

夷王

元年乙丑

始下堂而見諸侯荒服不至命虢公帥六師

伐太原之戎至俞泉獲馬千疋在位十五年崩

或云六十年

年六十子胡立是為厲王

厲王

元年庚辰

暴虐楚熊渠畏其伐去三子王號淮夷入寇

王命虢仲征之不克王好利近榮夷公大夫芮良夫諫曰王室其將卑乎夫榮公好專利而不知大難夫利百物之所生也天地之所載也而或專之其害多矣匹夫專利猶謂之盜王而行之其歸鮮矣榮公若用周必敗王不聽卒以榮公為卿士諸侯不享王行暴虐侈傲國人謗之召穆公虎諫曰民不堪命矣王怒得衛巫使監謗者以告則殺之諸侯不朝三十四年王益嚴國人莫敢言道路以目王喜告召公曰吾能弭謗矣召公曰是

鄣之也防民之口甚於防水水壅而潰傷人必多民亦如之是故為水者決之使導為民者宣之使言故天子

聽政使公卿列士獻詩瞽獻典史獻書師箴瞽賦矇誦

瞽無眸子矇有眸子而無見

百工諫庶人傳語近臣盡規親戚補察

瞽史教誨耆艾修之而後王斟酌焉是以事行而不悖民之有口也猶土之有山川也財用於是乎出猶其有原隰衍沃也衣食於是乎生口之宣言也善敗於是乎興行善而備敗所以產財用衣食者也夫民慮之於心

宣之於口成而行之若壅其口其與能幾何王不聽於

是國人莫敢出言三年乃相與畔襲王王出奔于彘

晉今

州霍邑漢為彘縣

太子靜匿召公之家國人圍之召公曰昔吾

驟諫王王不從以及此難今殺王太子王其以我為讐

而懟怒乎乃以其子代王太子太子竟得脫召公與周

公二相行政號曰共和厲王在位四十年流于彘并其

和十四年通五十四年崩于彘

或云在位三十七年通共和為五十一年

太

子靜長於召公之家二相乃立之是為宣王

臣謹按共和者周召二公共行政而無相違戾者也
汲冢紀年及魯連子曰共國之伯名和行天子政

宣王元年周召二相輔王法文武成康之遺風王命召
公虎平淮夷命皇父整六師程伯休父為司馬征徐戎
命召伯定南邦封申伯以褒其功命蹶父撫北土封韓
侯為諸侯長命仲山甫出使喻王之德意于四方乃城
東方以定齊邑海內翕然向風諸侯復宗周尹吉甫作
詩以美之王不籍千畝虢文公諫曰民之大事在農故

稷為大官今欲修先王之緒而棄其大功可乎王不聽
大旱自二年不雨至于六年十二年春魯武公與子括
戲來朝王愛戲命魯舍括而立戲仲山甫諫不聽卒立
戲是為魯懿公二十二年王晏起姜后脫簪珥待罪於
永巷使其傅母言於王曰使王好色而忘德失禮而晏
起自臣妾始敢請罪王曰寡人之過也自是早朝晏罷
卒成中興之業二十一年魯括之子伯御殺懿公而自
立三十年有馬化為人有兔舞于鎬京三十二年王伐

魯殺伯御立懿公之弟稱是為孝公諸侯自是不睦王
欲得國子之能訓導諸侯者樊穆仲曰魯侯肅恭神明
詢事考老賦事行刑必問遺訓而咨於故實王曰然則
能訓治其民矣乃命孝公於夷宮三十二年有馬化為
狐三十四年王征獫狁三十八年王伐條戎奔戎王師
敗績三十九年與姜氏之戎戰于千畝王師敗績王御
奄父曰公仲脫王奄父者趙造父六世孫王既喪南國
之師乃料民於太原仲山甫諫曰古者不料民而知其

多少且無故料民天之所惡也王卒料之周道復衰四十一年王征申戎破之四十六年崩初王將殺杜伯而非其罪杜伯之友左儒爭之于王九復不許王曰汝別君而異友也儒曰君道友逆則順君以誅友友道君逆則帥友以違君王怒曰易而言則生不易則死儒曰士不枉義以從死不易言以求生臣能明君之過以正杜伯之無罪王殺杜伯左儒死之後宣王畋于圃田見杜伯執弓矢射王王竟崩于田所子幽王宮涅立

臣謹按史記自共和之後始書年紀甲共和之前則
無年也皇甫謐之徒及歷家自義皇以來各有年代
閒或異同臣今亦從之而注甲歷及異同於其下聊
備觀採然皆不足取信也共和始於庚申終於癸酉
盡十四年宣王元年始於甲戌自此以後年數具在
甲歷可推然仲尼紀年始於魯隱蓋本東周

幽王二年西周三川皆震

三川者涇渭洛皆秦地之水非東周之三川也

伯陽

甫曰周將亡矣

伯陽甫周柱下史老子也

夫天地之氣不失其序若

過其序民亂之也陽伏而不能出陰迫而不能蒸於是
有地震今三川實震是陽失其所而填陰也陽失而在
陰原必塞原塞國必亡昔伊洛竭而夏亡河竭而商亡
今周德若二代之季矣其川原又塞塞必竭夫國必依
山川山崩川竭亡國之徵也若國亡不過十年數之紀
也是歲三川竭岐山崩初王伐褒褒人獻褒姒王惑之
褒姒年十四與虢石父比而譖申后及太子宜臼大夫
尹氏及祭公復導王為非六年王命伯士伐六濟之戎

王師敗績伯士死之是時四夷交侵戎圍犬邱秦世父擊之為戎所虜歲餘復歸之八年王以鄭伯友為司徒和集其民周人便之是為鄭桓公九年王廢申后及宜臼以褒姒為后立其子伯服為太子宜臼奔申太史伯陽曰禍成矣無可奈何褒姒不好笑王說之萬方不能得周制有寇至則舉烽燧大鼓諸侯悉至王乃大舉烽燧諸侯至而無寇褒姒乃大笑王為是數舉烽燧其後不信諸侯益亦不至褒姒好聞裂縵之聲王發縵裂之

以適其意號石父佞而好利王以為卿士朝多亂政諸侯不享王室騷然於是為太室之盟戎狄叛之十一年王欲殺宜臼求之於申申侯弗予王伐之申侯與鄩人召西夷犬戎攻王王舉烽燧徵兵兵莫至遂殺幽王驪山下戲水虜褒姒并殺鄭桓公盡取周賂而去諸侯即申共立宜臼是為平王以奉周祀是時秦襄公衛武公將兵救周平戎鄭人立桓公子掘突是為武公幽王末年日暈再重內赤外輕有一黑晝上下通在日中牛化

為虎羊化為狼幽王在位十一年

臣謹按自武王元年己卯至厲王四十年己未二百八十一年自共和元年庚申至幽王十一年庚午七十一年共三百五十二年為西周又按幽王既死鄭武公晉文侯輔平王東遷號公立伯服是為攜王故左傳曰攜王奸命杜預曰攜王伯服也古文作伯盤攜王之立國人不順未經年而廢之又按汲冢紀年曰幽王死申侯魯侯許文公立平王於申號公翰立

王子余二王並立余為晉文侯所殺

臣又按周太史伯陽讀史記曰周亡矣昔自夏后氏之衰也有二神龍止於夏庭而言曰予褒之二君夏帝卜殺之與去之與止之莫吉卜請其殽而藏之乃吉殽龍所吐沫也於是布幣而策告之龍亡其殽在櫝而藏之夏亡傳其器于商商王傳其器于周比三代莫敢發厲王末年發而觀之殽流于庭不可除也厲王使婦人裸而譟之殽化為黑黿入王後宮後宮之童妾

既亂而遭之既筭而孕無夫而生子懼而棄之宣王

之時童謠曰檠弧箕服實亡周國

檠弧檠木為弓箕木名服矢房

有

夫婦賣是器者宣王使執而戮之逃於道見鄉者後
宮所棄乃女子也夫婦哀其夜號而收之遂奔褒國
褒人有罪請入是女以贖以其出於褒故謂之褒姒
姒褒姓也

平王即位當幽王之亡豐鎬蕩然犬戎侵逼近郊於是
晉文侯鄭武公秦襄公夾輔平王于申而遷于王城即

成王所營之東都也王勞晉鄭而賜之盟曰世世子孫
無相害也命晉文侯為侯伯賜秬鬯圭瓚封秦襄公為
諸侯賜岐以西之地秦始通于上國命鄭武公為司徒
鄭於是取鄆虢十邑之地而遷焉是為新鄭自是齊楚
秦晉始大政由方伯天子微弱戎狄交居乎諸夏自隴
以東及乎伊洛與戎雜居故渭首有狄原封冀之戎涇
北有義渠之戎洛川有大荔之戎渭南有驪戎伊洛間
有揚拒泉皋之戎潁首以西有蠻氏之戎實賴秦人為

西堡障故秦文公伐戎收周之餘民而得岐內之地自岐以東獻之周周平王四十九年魯隱公元年也五十一年崩太子洩父早死立其子林是為桓王

桓王平王之孫也三年鄭莊公來朝王不禮焉莊公者桓公之孫武公之子也桓公死於幽王之難武公輔平王東遷莊公欲脩祖禰之好而王不禮之鄭始怨周五年鄭與魯易許田許田者天子有事于泰山鄭人來相事之田也今易於魯示忘於周也十三年王奪鄭伯政

鄭伯不朝王伐鄭鄭人禦之矢中王肩二十三年桓王崩子佗立是為莊王

莊王二年十月辛卯朔日有食之四年周公黑肩欲殺王而立王子克王子克者莊王之弟子儀也周大夫辛伯告王王殺黑肩克奔燕莊王在位十五年崩子胡齊立是為僖王

僖王

僖亦作釐

三年春諸侯會于鄆齊桓公始霸楚亦始大

五年崩子閔立是為惠王

閔一作諒

惠王二年秋周大夫為國邊伯詹父子禽祝跪奉莊王之寵子子頹以伐王王出奔溫蘇子奉子頹奔衛衛師燕師伐周立子頹為王設饗禮作樂徧及六代之舞三年鄭伯和王室不克遂以王居于櫟四年虢公鄭伯同伐王城殺子頹及五大夫而納王十年王使召伯廖賜齊桓公命為侯伯二十四年冬王崩太子鄭畏太叔帶之難不發喪而告難于齊二十五年春諸侯盟于洮謀王室也襄王定位而後發喪春秋書十二月丁未從告

也是歲周有白兔舞于市

臣謹按惠王十五年七月有神降于莘王問內史過曰何神也對曰昭王娶於房曰房后有爽德協於丹朱丹朱憑身以儀之生穆王實照臨周之子孫今在虢土虢君無道其亡乎王曰吾其若之何對曰祝史奉牲以獻焉而勿祈也虢公使祝史請土焉過聞之曰虢亡必矣

襄王即位襄王之母早死陳嬀繼之實惠后生叔帶有

寵於惠王王欲立之襄王三年王使召武公及內史過
賜晉惠公命惠公執王情過歸告王曰晉侯不亡必無
後夏叔帶召戎伐京師入王城焚東門秦晉伐戎以救
周是歲雨金于晉四年秋叔帶奔齊是歲星晝隕于秦
有聲十二年宋襄公霸十四年王以富辰之言召叔帶
自齊歸于京師五年為戎難齊帥諸侯戍周初平王東
遷辛有適伊川見被髮祭於野者曰不及百年此其戎
乎其禮先亡矣秋秦晉遷陸渾之戎于伊川十六年秦

穆公霸秋狄人奉叔帶攻王王出適鄭居于汜子帶自立為王居于溫十七年晉文公用狐偃之言納襄王殺叔帶王賜晉文公南陽之田二十年晉楚戰于城濮楚師敗績五月王命晉侯為侯伯於是晉文公始霸冬王狩於河陽以勞晉師二十九年秦用由余謀伐戎益國十二開地千里王使召公過錫穆公以金鼓三十三年崩子壬臣立是為頃王

頃王在位六年崩周公閱與王孫蘇爭政故不赴于諸

侯是歲有星孛入于北斗

匡王元年六月辛丑朔日有食之三年秋甘歃敗戎于邲
邲垂六年崩子瑜立是為定王史記云弟瑜立

定王元年春楚子伐陸渾之戎遂觀兵于周疆王使王
孫滿勞楚子楚子問鼎之大小輕重滿曰在德不在鼎
昔成王定鼎于邲鄢卜世三十卜年七百周德雖衰天
命未改鼎之輕重未可問也五年河徙六年王使單襄
公聘于宋八年使劉康公聘于魯十四年成周宣榭火

十七年劉康公伐茅戎敗績二十一年崩子夷立是為簡王

簡王八年春魯成公朝周王使劉康公成肅公會晉厲公伐秦十二年尹武公單襄公及諸侯伐鄭十三年春晉人弑厲公逆襄公之曾孫周于京師而立之是為悼公十四年崩子泄心立是為靈王

靈王生而有髭髯甚神聖東遷之後王室衰微至靈王始振二十一年十一月庚子孔子生二十七年王崩次

子貴立是為景王

臣謹按皇覽曰靈王冢在河南城西南相亭西周山上蓋以靈王生而有髭又神聖故謚靈王其冢民祀之不絕又按馬總亦曰靈王生而有髭十六年太子

晉登仙

景王八年春魯舍中軍卑公室也四分公室季氏擇二仲叔各一皆盡征之而貢于公二十五年崩景王太子早卒王子朝以庶長景王愛而欲立之未及而崩王子

丐之黨爭立國人立王子猛是為悼王

臣謹按皇覽曰景王冢在洛陽太倉中秦封呂不韋洛陽十萬戶故大其城并圍景王冢

悼王立未及一年王子朝攻殺之晉人攻子朝而立匄是為敬王敬王者悼王之母弟也

敬王元年晉人立王王子朝自立王不得入居于澤四年晉率諸侯納王于周尹氏召伯毛伯以子朝奔楚十年王以子朝之亂王城墮壞欲遷于成周八月王使富

辛石張請城于晉冬晉魏舒合諸侯之師城成周十四
年春王人晉侯會諸侯于召陵謀伐楚十五年王人殺
子朝于楚十六年周儋翩率王子朝之徒因鄭人作亂
伐周六邑十二月天王處于姑牆十七年尹氏復黨儋
翩為亂夏單武公劉桓公敗尹氏于窮谷冬單子劉子
逆王十一月王入於王城十八年春單子劉子討儋之
黨以定王室三十九年春魯人西狩獲麟四十一年夏
四月己丑孔子卒四十三年王崩子仁立是為元王

史記

四十三年敬王崩皇

甫謚云四十四年崩

元王在位八年崩子介立是為貞定王

貞定王

亦曰定王

十六年三晉滅智伯分其地二十八年王

崩太子去疾立是為哀王

哀王在位三月弟叔襲殺哀王而自立是為思王

思王在位五月少弟嵬攻殺思王而自立是為考王

嵬一

作隗此三王皆

定王之子也

考王即位封其弟于河南是為桓公以續周公之職號

西周桓公桓公卒子威公立威公卒子惠公立惠公卒
子武公立武公生共太子早死立公子咎為太子初惠
公有二子封其少子於鞏以奉王號東周惠公十五年
王崩子午立是為威烈王

威烈王二十三年九鼎震

或作二十一年

王命晉大夫韓趙魏

為諸侯二十四年王崩子驕立是為安王

驕一作龍

安王十六年初命齊太公田和為諸侯二十三年齊康
公薨田氏遂篡齊而絕其祀二十六年韓哀侯滅鄭韓

趙魏共廢晉靖公為家人三分其地晉是以不祀王崩子喜立是為烈王

烈王

亦曰夷烈王

二年周太史儋見秦獻公曰始周與秦國

合而別別五百載復合

周孝王封秦仲為附庸是與周別自秦仲至孝公五百年孝公

疆大周顯王入秦致伯是復合也

合十七歲而霸王者出焉

秦武王昭襄王皆霸

至始皇而王天下

十七年王崩弟扁立是為顯王

顯王

亦曰顯聖王

五年秦獻公敗三晉于石門斬首六萬天

子錫以黼黻九年致文武胙于秦孝公十六年齊威王

最彊始稱王以號令天下二十五年秦孝公會諸侯朝
周二十六年天子致伯于秦孝公三十三年賀秦惠王
即位魏惠王卑禮厚幣招賢鄒衍淳于髡孟軻之徒皆
至三十五年致文武胙於秦惠王蘇秦說燕與趙合從
以拒秦三十六年蘇秦說趙肅侯請六國合從以拒秦
蘇秦相六國為從約長張儀入秦秦惠文王以為客卿
三十七年秦使犀首期齊魏共伐趙趙以責蘇秦蘇秦
去趙而從約皆解四十一年張儀說魏王盡以上郡十

五縣入于秦秦以張儀為相四十四年秦惠文王始稱王其後諸侯皆為王四十八年王崩子定立是為慎靚王

慎靚王

亦曰順靚王

三年趙楚韓魏燕共伐秦攻函谷關不勝皆敗走四年張儀復相秦敗韓趙兵于脩魚斬首八萬諸侯震恐六年王崩子延立是為赧王

赧王之時東西周分治赧王復居王城號西周周桓公之孫惠公居洛陽為東周或言趙成侯八年成侯與韓

分周以為兩赧王雖居天子之位為諸侯所侵與家人無異多負於人無以歸之乃止臺逃避周人名其臺曰逃債臺八年東周與西周戰韓救西周或為東周說韓王曰西周故天子之國多名器重寶王案兵毋出可以德東周而西周之寶必可盡矣

史記於此
下闕文

後楚圍雍氏

韓徵甲與粟於東周君東周君恐召蘇代而告之代曰

君何患於是臣能使韓毋徵甲粟又能為君得高都

韓邑

也周君曰子苟能請以國聽子代見韓相國曰楚圍雍

氏期三月也今五月不能拔是楚病也今相國乃徵甲
粟於周是告楚病也相國曰善使者行矣代曰何不與
周高都相國大怒曰吾不賦甲與粟於周亦已多矣何
故與周高都邪代曰與周高都是周折而入韓也秦聞
之必大怒忿周即不通周使是以敝高都得完周也曷
為不與相國曰善果與周高都三十四年蘇厲謂周君
曰秦破韓魏扑師武

扑一作仆
武韓將名

北取趙藺離石者皆白

起也是善用兵又有天命今將兵出塞攻梁梁破則周

危矣何不令人說白起曰楚有養由基者善射去楊葉
百步而射之百發百中觀者數千人皆曰善射有一人
立其旁曰善可教射矣養由基怒釋弓搯劍曰客安能
教我射乎客曰吾非能教子支左詘右也夫去柳葉百
步而射之百發百中不以善息少焉氣衰力倦弓撥矢
鉤一發不中百發盡息今破韓魏扑師武北取趙蘭離
石者公之功多矣今又將兵出塞過兩周倍韓攻梁一
舉不得前功盡棄公不如稱病而毋出五十九年秦取

韓陽城負忝西周恐乃倍秦與諸侯約從將天下銳師出伊闕攻秦令秦毋得通陽城秦昭王怒使將軍摎攻西周西周君奔秦頓首受罪盡獻其邑三十六口三萬

秦受其獻歸其君於周周君王赧卒

宋忠曰諡西周武公

周民遂

東亡秦取九鼎寶器而遷西周公於囂狐

囂即憚字囂狐聚在洛陽

南百五十里梁新城之間

後七年秦莊襄王滅東西周兩周皆入于

秦周是以不祀秦以其地為三川郡漢興九十有餘載


天子將封泰山東巡狩至河南求周苗裔封其後嘉三

十里地號曰周子南君比列侯以奉其先祀實武帝元鼎四年也

右周之世起武王元年己卯或曰戊寅至赧王五十九年乙巳三十一世三十七王八百六十七年而亡

臣謹按八百六十七年之間三百五十二年為西周五百十五年為東周也又按四百年在春秋前二百四十二年在春秋內二百二十五年在春秋後合八

百六十七年



通志卷三下